



藝海珠塵

14
1627
42





門 44  
號 1627  
卷 42



藝海珠塵

夏內史集

夏完淳篋

完淳字存古江南華亭人明考功郎中  
治丁亥走吳易軍為參謀被執不屈死年  
十七乾隆四十年

卷一賦一首

大哀賦

并序朱錫嘯彝尊云存古南陽知二江  
夏無雙束髮從軍死為毅魄其大哀一賦  
足敵蘭成昔終童未聞善賦注

粵以乙酉之年壬午之月玉鼎再虧金陵不復公私傾

藝海珠塵

夏內史集卷一

大華圖書館  
25 10.30  
來



覆天地崩離託命牛衣巢身蝸室弔東幸之翠華蒙塵  
軼道望北來之浴鐵飲馬姑蘇申胥之七日依牆秦庭  
何在墨允之三年採薇周粟難食黃農虞夏遐哉尚友  
之鄉南北東西渺矣容身之所在昔士衡有辯亡之女  
孝穆有歸梁之札客兒飲恨於帝秦子山傷心於哀亂  
咸悲家國並見詞章余始成童便膺多難揭竿報國東  
髮從軍朱雀戈船蕭蕭長往黃龍戰艦茫茫不歸兩鎮  
喪師孤城潰版三軍魚腹雲橫歇浦之帆一水狼煙風  
動秦房之火戎行星散幕府颺離長劍短衣未識從軍  
之樂青薜蔓草先悲行路之難故國云亡舊鄉已破先

君絕命哭葯房於九淵慈母披緇隔祗林於百里羈旅  
薄命漂泊無家萬里風塵志存復楚三秦壁壘計失依  
劉蜀帝子規千山俱哭吳江精衛一水羣飛哭海島之  
田橫尚無其地葬平陵之翟義未有其人天晦地冥久  
同泉下日暮途遠何意人間魯酒楚歌何能爲樂吳歛  
越唱祗令人悲已矣何言哀哉自悼聊爲此賦以舒鬱  
懷嗚呼黃旗紫蓋雪戟霜矛何意南朝天子竟投大將  
之戈北部單于遂繫降王之組豈高廟之馨十七世而  
旁移孝陵之澤三百年而中斬乎此天時人事可以疾  
首痛心者矣國屯家難瞻草木而撫膺岳地辰傾覩河



山而失色勞者言以達其情窮人歌以誌其事追原禍  
始幾及千言寄愁心於詩酒阮籍途窮結豪士於屠鷄  
張良滄海後有作者其重悲余志也夫  
維昭代之代興也乘土德而紹王麗旭日而承天帝執  
柄以司命聿嶽鎮而辰懸掃旄頭以靜衛鞭角端以定  
邊窮邛笮通浪立朔方大出南交凱旋崇文會武東鯨  
西鷄閱兵則法高司馬論都則賦雄孟堅備禮樂於虎  
觀絕烽火於狼煙法不更而澤久兵不耀而威宣儼唐  
虞而比德尚殷周而卜年不意瑤輪無長炯之期玉歷  
有中屯之會天子端拱無爲塞聰而治羽獵火五柞之

場歌舞納三雲之地震筵分枯苑之形泰階起蜩蟬之  
異議論廟謨干戈兒戲有道咏瞻烏而長歎索公指銅  
駝而下淚山未頽而黯然海不波而潛沸然四極未虧  
三倫不易草木寒於北街星日輝於南極閭左多游俠  
之徒京華無憔悴之客迨而虎帳不朝漁陽直  
入遼水無聲鑿閭慘色烏桓解卑之部封豕長蛇之力  
徙帳幕南空羣冀北中行之背未笞趙信之城再立使  
我燕頷龍韜霜戈雪戟出榆塞而不還墜梨矢而長黑  
翻添月窟之哀長有山陰之哭於時五帥不歸三城莫  
復在背肩水侵肘腋元子所以傷心江統於焉太息



且也朝堂多水火之爭邊徼有沙蟲之戚未拜郭隗先  
誅李牧熊羆夜而星淪猿鶴秋而天覆自蔽日之借叢  
卒終星而喪國繼以中常侍之竊政大長秋之尸祝聖  
燒定中禁之謀節讓起北宮之獄顧廚禍酷於三君纍  
若權延於五鹿璿庭之璧月幾淪虞淵之曜靈不浴孤  
臣飲恨於屬鏤碩士含辛而囊木况夫疆場多事邊境  
傳烽恒落魚門之胄空誇馬服之功衛青未聞其絕幕  
魏絳不見其賜鐘庸邀汗馬策賣盧龍及夫星明少海  
天乎天橫殷丁河亳之志周宣江漢之風誅司隸之王  
甫災誣史之蔡邕然兵由積弱政以賄崇敝箠不能止

宣房之決勺水不足息驪山之紅見伊川之披髮鳴天  
山而掛弓笳鼓震於遼陽旌旗明於塞上問九鼎之重  
輕窺山川之保障嘶風則苜蓿千羣卧野則駟駟萬帳  
定遠非萬里之侯驃姚無百戰之將登陴而魚鑰倉皇  
入援而龍旆震蕩

衛丁零叛於東膠毛修之亡於樂浪非無刁斗之將軍  
尚有綸巾之丞相山鳴石鼓宿動金精三輔之苜蓿春  
牧諸陵之弓劍宵驚降將雲帆北渡賢王寶馬東征方  
將鴻雁集其安宅鸞鷲奏其昇平列九賓而告廟開八  
門而受寧忽焉五斗米之教起三里霧之術成秦晉蜂



攘豫楚蟻營中橫淝泗南極湘荆元帥給雲臺之仗尚  
書開武庫之兵或墨衰以莅金革或班劍以任鼓鉦卒  
之黃巾黑犢之聚散青袍白馬之橫行王曰叔父君之  
寡兄或嬰白刃有結丹纓赤社噶而青茅廢靈光頽而  
茂苑傾式虧國族深軫宸情祭通侯於太牢束帛成王  
人於揚水流薪帝子沒而煙凝南浦王孫隕而草遍空  
城盜長陵之抔土傷神州之陸沉彼何人斯哀哉至今  
矧夫上谷爲鼙鼓之場北海無龍蛇之陣李都尉部曲  
不歸陸平原風流頓盡歎馬陵之道窮絕龍城之霄遁  
國門則畫策萬千旌節則功勳尺寸干城爲矛戟之讎

醜毒是鹽梅之分恒見恥於少卿之書非所望於錢神  
之論聖人勵玉衣而靡替垂翠裘而獨悶便殿空談平  
臺屢問賜金鬻則執政爲貴人之牢望山頭則廷尉皆  
君子之吝然主威雖上法宣武一作武宣臣德實遠慚廉藺  
使臂逆而更難養癰潰而莫吮所以遼水東西人多犯  
順大河南北野皆饑饉黑山藉以益繁尤來聚而愈迅  
遇王師如秋風之捲枯下堅城若朝霜之悴菌赤羽動  
而北馳黃金鳴而西振封函谷之一丸據雍州之九郡  
城郭胥淪衣冠偕隕犀兕有未贖之華元丹青有不歸  
之子禁旣度陝而叩關復踰河而入晉三千屬犀之騎



十萬迎風之刃黃金臺之蔓草空哀白玉仗之春采俱  
震地坼天崩海焦星窟蚩尤之毒霧彌天軒轅之鼎湖  
虛殞恨黃竹於千秋悲蒼梧於一瞬椒宮爲血淚之相  
君鶴駕有呼魂之子晉弔望帝以何期矢叩閭而難進  
可憐淚雨之昭陽更有風塵之長信桐棺墮馬鬣之封  
栢路捲龍輻之輶嗚呼當斯時也四海驚飛三靈恫震  
溘靈飈而大招弔五雲而長恨天上將軍之鐵馬呼風  
宣陵孝子之布衣扶藪三百年玉座晝移十六世金鋪  
夜燼且也劉太尉留於薊北琅琊王渡於江陰哭秦庭  
而歸虎穴卜周鼎而陷龍涿秣陵王氣則黯然欲盡易

水寒風則悲哉正深將軍之樹北偃之部西臨假  
號子輿於城下不立盧芳於雁門借蚌鵲之利逞  
之心北闕之樓臺凋謝西山之松栢蕭森太液翻而石  
鯨慘澹茂陵廢而玉盃浮沉瞻河山而隕涕撫草木而  
沾襟雖君讎之少雪實國難之相尋郿塢爲燃卓之地  
漸臺興剗莽之軍既追風而西捷遂射日以東侵使南  
朝天子北府大臣烏衣則披綸揮扇黃葛則懸膽卧薪  
器成錯節聖啓憂殷祖士雅則雍州出牧劉奉春則昌  
頓和親組練餘艘者八百里鮫皮犀屬者十萬人佛狸  
無飲江之志老罷成卧路之勲而乃東昏侯之失德蒼



梧王之不君玉兒寵金蓮之步麗華長玉樹之淫柏梁  
建章則讀西京之趙鬼臨春結綺則號學士之孔嬪吳  
歛越艷魯酒梁尊先見乎玉杯象箸復徵夫酒池肉林  
問蛙鳴於爲公爲私御龍袞於若亡若存視江都而未  
武擬長城而不文冠蓋之銀青俱滿朝廊之銅臭相因  
但知安石之賭墅何止元規之避塵楚囚無新亭之淚  
越絕非石室之音南徐之兵甲不勁淝水之草木無神  
拜蔣侯爲靈帝弋白雁爲國賓柱石則孔愉江統闔外  
則祖約王敦將相盡更始之羊胃衣冠多南渡之雁民  
宜其及矣況有強鄰於時清人河上之師天室通好之

使未許其冠帶春秋遂至夫荆榛天地蘇屬國之旄節  
不歸庾開府之江關永棄移貂帳之千里逐龍駒之萬  
騎投鞭則淮水不流飲馬則長江無際白羽死其孔明  
綠幘亡其道濟嗟乎揚州歌舞之場雷塘羅綺之地一  
旦煙空千秋景異馬嘶隋柳之風蜃吐海門之氣潮上  
廣陵而寂寞枝發瓊花而憔悴鉅鹿沙崩長平瓦碎豺  
虎相臨蛟兕俱退鬼有曹社之謀天同鶉首之醉欃槍  
空鐵甕之城弧矢落金山之壘天子蒙塵將軍仗義軹  
道降王長安舊帝朱組輿櫬之羞青衣行酒之事白日  
蒼茫黃雲迢遞楚姬之錦瑟新調代馬之丹鬃乍繫元



武池邊景陽宮裏莫愁之歌舞如何長樂之鐘聲已矣  
 斜陽歸而燕子秋飛蔓草平而後湖月起秦淮則一點  
 青煙桃葉則三聲漁市蘼蕪遍於故宮莓苔碧於舊址  
 平康之絕巷雞鳴鐘嶺之空山鶴唳風塵蕭索兮十二  
 樓煙雨淒迷兮四百寺烏啼上苑之花鵲噪孝園之樹  
 故老吞聲行人隕涕殷王子麥秀之歌周大夫黍離之  
 淚天地何心河山無罪若夫龍種困而被奴鷓鴣儀降而  
 為婢逐燕支而上馳抱琵琶而北去黑山之月年年青  
 冢之花歲歲室處有茶之淫 一作 髮有 衫之累  
 於是竿木羣興風雲畢會興六月之師振九天之銳橫

海伏波戈船下瀨軌 秦之陳勝效安劉之翟義誅殷  
 通於戲下斬 阜於帳外青雀煙騰黃龍雲邁夸父有  
 投杖之心魯陽無挽戈之計兵弱鄰強地柔人脆傷心  
 夫王子白衣絕望於將軍蒲類田橫之五百軍人項籍  
 之八千子弟平陵東而黃犢可賣下澤左而烏騅不逝  
 天蕭蕭兮不明日荒荒兮欲曠傷兩鎮之不歸痛孤城  
 之已潰聞楚歌則部曲蕭條聽胡笳則征夫歔歔國殤  
 悲而陰雨深戰鬼哭而愁颺厲煙草依然江湖如是毅  
 魄東歸一作歸來靈風涕泗至若江關不見鄉國何方坑既  
 酷於新安火復烈於咸陽谷水無浮雲之便崑山非行



雨之鄉姑蘇烽火樵李蕪荒草入語兒之館月明響屨  
之廊美人則紫臺黃土英雄則白草青霜風何爲而慘  
慘雲何地而茫茫禮魂兮春蘭秋菊弟古兮山高水長  
悴瓊枝而無色零瑤草兮不芳三秋桂冷十里荷香景  
光黯黯兮消魂煙波漠漠兮斷腸夜不寐而隱隱淚沾  
襟而浪浪何日度鶯花之月何年歸玳瑁之梁燕巢枯  
柳蝶舞空牆爐頭無少婦之酒城東非年少之場舊遊  
零謝獨壘荒涼歸去則杜鵑啼月力微則精衛填江況  
夫國屯家難先子云亡訪彭咸於葑室從墨允於首陽  
留遺孤於廬聖曾仗劍於戎行濟雲帆之無路匿土室

而自傷王章之牛衣空卧馬卿之憤鼻頻穿王夷之車  
長鐵范曄之麝空懸任西華單衣見肘孫叔敖餒鬼誰  
憐弱齡則海籌十六短髮則霜鏡三千惟我生之不辰  
丁窮酷之蒼天若乃天南鼎定浙右龍騫劉文叔南陽  
白水越勾踐采葛飛鳶乾坤重照日月雙懸湖中賈勇  
內地爭先司馬秉中軍之鉞虞人麾上將之旃三吳漁  
獵七郡風煙扁舟勢疾三鼓氣堅余乃飄搖澤國躑躅  
行間飲君親之夙恨鬱家國之煩冤短衣則東州亡命  
長戟則西掖備員既有志於免胄豈無心於喪元伍大  
夫昭關馬渡張留侯滄海龍潛統綺非封侯之骨漁樵



當用武之年千里之月明鼓角五湖之春泛樓船魚龍  
蟠於甲帳裘馬壯於戈鋌錦纒毬三軍高宴金叵羅諸  
將扣舷旣充下乘敢托中涓草檄則遠愧孔璋入幕則  
深慚仲宣濤寒震澤風厲由拳秦帝之椎末中楚王之  
墓不鞭時無文范人乏策權龍衣逝矣魚服困焉吳明  
徹之功名何在秦武陽之拳勇堪憐吳要離矛因風轉  
楚龔勝膏以明煎高漸離之筑聲往矣徐夫人之匕首  
依然亡楚之功不就報韓之志誰傳兼以五馬則寡君  
雲夢六龍則周王翟泉三戶亡秦之讖九歌哀郢之篇  
功成姬辛名假蘇燕義公旣刼壯夫不還王褒則夢我

三廢夏馥則傭保十年人林白愧夫介推蹈海深慚夫  
魯連管寧卓帽箕子朝鮮煙斷營門之柳霜凋幕府之  
蓮國亡家破軍敗身全招魂而湘江有淚從軍而蜀國  
無絃哀哉欲絕已矣何言嗚呼予生於烈皇之朝長於  
聖安之世佐威虜以于征從長興而再起追懷故君何  
臧何否言念舊臣何功何罪或盱食而宵衣或墮簪而  
遺珥或麥飯以自嘗或肉糜之堪耻推本先朝追原禍  
始神祖之垂拱不朝嘉廟之委裘而理罪莫熾於趙高  
害莫深夫褒姒惟屈釐之下獄與朱浮之賜死離大臣  
之無刑非聖人之得已至於五世偏安三朝舊事指觸



瑟爲貞觀目采芝爲佞軌使  
之北風陷泥塗於南  
紀殷深源之方畧空空王夷甫之風流爾爾若乃威虜  
偏裨長興文吏原非將帥之才未有公侯之器興懷鴻  
鵠之言頗見龍蛇之志日日胡牀之卧夜夜釣天之醉  
旣一戰之未申淪九死而靡悔黃土一杯丹靑萬禩余  
草木門庭旂常家世家淑人黃鵠之悲先文忠白虹之  
氣非無德耀之妻尚有文姬之姊衣冠連於杜曲姓氏  
通夫槐里寄食無鄉望塵有地范丹之甌長寒卞彬之  
蝨未棄達士窮途之悲壯夫歧路之淚載念簪纓言懷  
邦國恨欲言而聲已吞愁將訴而淚沾臆何必雍門之

琴無假武陵之笛日月如馳親朋不識獨劍空囊三江  
浪迹人容鼓史之狂世笑公之癖混緇衣之高賢結  
屠簫之豪客三桑無再浴之期一飯有千金之值望舊  
鄉而雲影蒼蒼弔故壘而風聲惻惻蔣詡之徑不開王  
猷之舟時出秋水迢迢塞林蕭瑟野獸暮號羣鴉晚集  
鶴唳霜驚鷗眠月直過耳傷神仰天太息山氣兮江光  
春陽兮秋色嫖姚空舊築之壇郎將有先陪之戟蛟龍  
非遇雨之期鯤鵬無御風之力韓王孫之城下知已誰  
人宋如意之堂前傷心何極下江但見夫綠林圯橋未  
逢黃石此孤臣所以輟食而拊心枕戈而於邑者也



藝海珠塵

夏內史集

夏完淳篋

卷二 賦九首

騷九首

寒泛賦

若夫河海之廣雖折葦而可杭江漢何深亦浮杯而可渡況乎方舟一葉既無濡軌之憂野航雙槳堪問迷陽之路能無弔西方之芳草慟哭途窮傷南浦之寒煙淒

南匯

吳

省蘭

泉之輯

上海

李

丙繼

友瞻校



其歲暮者乎余也敝裘風宿短髮霜侵北首而懷漢臚  
南冠而咏越吟夙昔波濤之命平生江海之心雖宋玉  
悲秋戒魂遊於湘浦而王猷泛雪還興盡於山陰矧乃  
擊水三千嘯巨鯤於深壑通衢十二泣枯魚於釜鬻仲  
御則海濱擊楫伯牙則山水鼓琴涉江避世不厭其深  
者也爾乃飄零殘臘躑躅窮年冰池翠潔寒江碧鮮木  
蘭倚棹芙蓉刺船鸚鵡煙波之檻鷓鴣風雪之天呼豨  
則布帆無恙欵乃則輕橈宛然駕濤船而非神乘蠶舟  
而不仙三江落梅之雪五湖衰柳之煙度空城兮蕪郭  
凌大浦兮寒淵秋蓬亂飛古木微脫寂寞潮回蒼茫雲

合江鳧浴其平沙寒鴉噪其晚葉動曉氣而連吳弄煙  
光而平雪可以遠遊於焉寒涉苦匏浮水之罌桃葉渡  
頭之楫荒荒宿雁之霜慘慘蘆花之月長天勁隼空汀  
孤鶩楓湛湛而流丹鷗亭亭而失素數聲出浦之漁歌  
幾點平原之鬼火迷青雨於荒洲斷黃雲於古渡天雞  
之響不窮海鶴之飛無數荒邱無字之碑華屋何人之  
墓隱隱遙山蒼蒼平戍傷心半死之蘼蕪滿目無花之  
古樹弔故渚之秋蓬訪芳洲之殘杜旣擊汰於回谿復  
停橈於歧路猿噉噉而呼風天低低而如霧柴門半掩  
之野人推笠相逢之漁父煙水則羊裘見彝風浪則鴨



夷未遇衛邱一節之竹南華五石之瓠禦寇之風冷然  
予胥之潮時怒度舫影其若搖泣榜歌而如訴清商之  
曲不調子夜之聲數誤魚無情而仰沫鳥欲飛而難度  
加以掀蘆亡命風波逝魂憔悴江潭之客髣髴蘆中之  
人驚風朔雪桂柁潺湲糾糾葛屨之公子靡靡衰草之  
王孫澄江兩楫寒酒一尊月朧朧而虛朗煙漠漠其黃  
昏霜滿烏啼之夜風高鶴唳之村魂消易水腸斷夷門  
瀨女以壺漿託命漂母以一飯留恩抑古今之殊軌豈  
窮達而同論昔芳景之盛年麗風花於江表三春鬪草  
佳人二月踏青年少綺羅彩舫之徘徊簫鼓畫船之練

繞柳絲春斷梨花風曉夜夜合歡之花處處宜男之草  
醉殺莫愁之湖夢盡江南之道雲水迢迢秋光渺渺迴  
鳴鶴之吳舟激采菱之越棹隔浦紅蓮牽舟碧藻錦帆  
之月虛涼絲纜之風微曷歌舞如灰鶯花已老訪青翰  
之鄂君挾西冷之蘇小至若舳舻春泛組練秋明三千  
水犀之甲十萬伏波之兵黃龍煙邁青雀雲平軍中鮫  
屬帳下龍旌火攻下策澤國長征蘭白之帆如月露橈  
之壁爲城滄海君之意氣桓靈寶之功名三百九橋兮  
寒雨白七十二峯兮曉煙青連洪濤兮廢壘積荒葭兮  
故營滄波不極煙草無情綠沉水斷寶刀夜鳴哭樓船



之揚僕葬海島之田橫落霞飛而天斷斜月動而風清  
興懷三婦之艷再感五侯之鯖亡澤中之桓楚刺江上  
之陳平祖逖則臨流欲渡范蠡則規吳未成博昌之船  
已廢滄陽之牒無聲未受靈威之簡難逢蒼水之精榜  
人再唱客子數驚小海則烏鳶已厲大山則桂樹猶生  
煩鬱江魚之婢浩蕩海鷗之盟前鯨鯢而後鮪鯨弄江  
花而拾水英雖欲乘槎而問天不禁委淚之沾纓也

江妃賦

金風勁兮秋水多楓湛湛兮江始波  
寒芙蓉兮愁日暮  
泛清光兮蕩綺羅歌采蓮兮相思苦  
煙漠漠兮迷南浦

送夕陽兮迴舟愁脈脈兮不語餘霞散綺碧江舒練流  
輝軼光參差曼眩宛輕颺之髮鬢悅明霞之離合蔽蕤  
然之靈噫駕偃蹇之蕙楫一江臯之麗人窈亭亭而獨  
立秀爛發而非聲光四耀而無質煙霞微含乍近乍遠  
雲霞燦姿或舒或卷懸淵客之明蚌蒙鮫人之素綃的  
灼乎若菡萏之擢水飄飄乎若柳枝之凌颺惠秀中豐  
明艷外發秋娟娟兮却月眉春宛宛兮凌波鞵約雲鬢  
而如薄被霧縠而延俄迴窈窕之明眸逸連娟之曼蛾  
弄潺湲而微步啓丹脣而宜笑倩美盼之一迴迴餘輝  
之四照乘蘭輶其九氣服靈衣其五銖稱天孫之襄錦



曳緜母之翠裾笑漢女之解佩唯宓妃之贈璫陋巫陽  
於神女鄙素蓮於西王母曾波兮微睇精駘蕩而中疑  
守水精之絳盤定明璣而不移於時也肅惠風而往來  
整玉軼而徙倚拂瓊枝之珊珊蕩輕雲而裔裔玩江華  
之石英娛秋光之寂寥感鄙人之目成託微詞以見要  
跪臨風以致辭懷素娥之微歡翳修裾其如月吐芳氣  
以若蘭凌微瀾以未翔采翠羽以相寄悵陰陽之永睽  
悲嘉會之長棄乍容與於江干倏停輪於山椒神熒熒  
其未止光煜煜其忽搖右睨上元之冠左挾湘靈之袖  
婉閒閒其笑言翩善睐而色授爾乃轉盼未終流光四

迸迅如有神飄若無影遙敬耳而遠聽隱絳鸞之啾啾  
風靡靡而微動江湛湛其安流驚眾暉之雜遝泛幽光  
之有無波鱗鱗兮長往日渺渺兮愁余出浦兮素月流  
迴船兮碧雲合呼榜夫以問之迺緩歌以見答其詞曰  
沙棠楫兮江上寒芳草歇兮懷所歡千里兮滄江萬里  
兮碧山江妃歸去兮無處所朝雲暮雨兮留人間

寒城聞角賦

朔風起兮天末遊子行兮未歸望舊都兮無極思故鄉  
兮永違浮雲亭亭而去馬頽陽蕭蕭而入衣臯禽歸而  
爭宿寒獸走而因依短衣迎寒僕夫苦饑乃解霜鞍肅



星飯張虛牀坐閒館銀釭半明金爐不煖素河自流華  
月空滿覽寒城之迢遞聽清角之悲惋哀響乍急愁聲  
頓緩激寥亮而嗚鳴遲徘徊而款款絳霜已淒碧雲微  
卷天茫茫而逾高水悠悠而彌遠曲節微聯淒音忽斷  
啼猿則三聲月裏落雁則萬重雲畔草白煙黃山光水  
淡嘹唳而氣激白虹蕭條而聲流清漢變徵激烈清商  
宛轉和塞上之胡笳協隴頭之羌管齊急節兮城頭寒  
飈厲兮颼颼雲低回而不度江鳴咽而不流角已勁兮  
寶刀嘯邊馬嘶兮征夫愁別關山兮不夜肅天地兮如  
秋山鬼吹燈而共語青燐散野而未收煙平蒼戍月空

古洲家家擣素之石夜夜流黃之樓耿星漢而淚下怨  
關山之路修忽一聲之欲絕傷九迴而迢迢驚半夢於  
金微墜雙淚於玉鈎蕩子邊庭征人隴右柳葉衣兮漢  
月薄蓮花劍兮胡霜厚颯橫角之岩岩一作警部曲之  
相守仰萬馬而哀鳴哭三軍而回首蕭蕭大旗靡靡古  
柳濱血隱夫悲笳淚花寒夫征袖迺異國之羈人宿傷  
心之古堠稟不寐而披衣待丁丁之餘漏哀瑤暉之若  
練傷永宵之如晝淚浪浪而應聲鬢彫彫而對酒既回  
雁而橫參倏鳴雞而墜斗感寒角之清厲獨慷慨而赴  
赴當斯時也殘月在床征馬在廐長劍在腰柔轡在手



戒裝霜涉呼騶星走僕夫倦起行且謠曰辛苦兮長征  
清角兮淒聲旅雁嗷兮客心驚城烏啼兮天漢橫視東  
方兮未明君何爲兮遠行

塞燈賦

莫風方厲朔雪其凝丹靈未匿素魄未升天高銀漢星  
低玉繩思美人兮良夜怨玄夕乎塞燈耿亭亭其欲滅  
光熒熒其半明何永宵之昭言乃援毫而賦形夫銀缸  
之寒夜照鴈愁之獨眠酌南油而暉滿燃西漆而光懸  
鶴頸委其冰翔鯨鬣然而尚潛怨蜃脂之明涸傷蘭膏  
之芳煎謝玉枝之秀華讓荷蓋之澄鮮託金竿而影續

赴霜蛾而晃燃若其芳苒常生蓮莖恒滿卧玉虎而欲  
飛擁金鳧而不煖動翠帷則生花九枝解羅衣則銷明  
兩焰飛蛾繞而照空輕花重而微暗回槃之浮炷虛涼  
行帳之寒檠欲短丙夜而空花亂飛乙帳而淚珠不斷  
銷膏則華幔漂搖翦心則流蘇零亂獨叔歷於空帷隱  
流連於閨館迺夫幽娥永巷棄妾空房倚花缸而獨坐  
欹燈影而自傷照流黃而非月映擣素而非霜微明昧  
於瑤寢半徘徊於玉堂悲獨卧於雙花懷君王於九光  
丹灼灼以流帳青熒熒其映床移玉腕而微挑眩飄花  
其欲亡然死灰於獸炭泛寒碧於羽觴感愁心之脉脉



故搖曳而茫茫照兩地之相思燼雙炷之不老況乎歧  
路一身窮途兩淚空焚更生之藜時逢叔夜之魁通雲  
絕再築之期絕纓無可報之會問棠梨而無人觸老狸  
而獨寐能無瞻熒影而自憐撫青燈而長喟也哉

怨曉月賦

李舒章雲云古之善言怨者三百篇而後僅見離騷甚矣怨之難言也存古忠

孝性成纏綿懇摯遭時喪亂未及終賈之年殉身家國若此者可以怨矣吾讀其賦而悲其遇重其人并以愛其文焉

美人二八兮捲珠箔明月三五兮流華閣迴颺動兮玉  
櫳寒素河橫兮露華薄林騷騷而烏啼沙皚皚而雁落  
懷耿耿兮獨不寐恨盈盈兮將誰託捲翠被而凝妝掩

蓮帳而清酌翫膏銷兮銀缸蘭燼灰兮瑤筐憐玉腕兮  
相思苦怨愁人兮知夜長何望舒之玄轡流清景而遙  
光乍徘徊而入戶忽朦朧其在梁既宛轉其侵幕復飄  
颻而去床玉壺寂寞銀箭了當夢回遠塞淚滿空房萬  
里關山之月千家砧杵之霜度七襄之永夜斷九逝之  
迴腸望門前之烏相焚帳底之胡香懸夜光而盈室徂  
清夜兮未央逗瑤波而微見淡荒荒其映牆鉞河度兮  
西山玉斗轉兮雲間荒雞鳴而尚戢宿鳥翔而復還天  
將曙而漠漠夜若歲其漫漫獨牽錦帳靜撫雕闌仰視  
月兮髮髯弄清質之潺湲隱簾櫳兮玉鏡隔烟霧兮紅



藝海珍厯  
顏淡參差其欲下蹇蒼茫其未安哀芙蓉兮江上落梧  
桐兮井欄忽衆星之凌亂獨孤月之幽閑宛瑤華而如  
漾映瓊田而若寒風蕭蕭兮雲漫漫寒煙古兮木葉乾  
按瓊笙兮爲誰響抱銀箏兮不忍彈思蕩子兮行路難  
念征夫兮衣裳單明月入地兮夜在天夫君悠悠兮何  
時還

夜亭度雁賦

旅人寒宿孤雁數聲離魂淒然感陳後主夜亭  
度雁之賦爲廣而成篇

歲云暮矣夜何其長歸禽兮日將夕征客兮悲未央

極目兮千里愁遠涉兮三湘望古戍而停轡宿寒亭而  
解裝雲迷迷兮衰柳煙漠漠兮空桑銀河曖天金波委  
霜聽烏啼而戒涕聞猿嘯而沾裳迺蕭騷之北林雁嘹  
唳而南翔塞沙無際秋風幾行爾其哀翼連翩商吭清  
切緩羽飄搖緒音婉列振聲兮寒山空墜影兮秋江潔  
響失萬重之雲愁飛一片之月落浦則白鷺驚羣渡江  
則青鳩啼血劍過如邊角之蕭條遙聞如胡笳之悲惻  
天潭潭其古今霧濛濛其明滅草芸黃而芳凋木蕭騷  
而翠脫胡雛之淚雙流戍婦之聲再咽聲飛笛裡之梅  
光落沙中之雪惟古隴之征夫與空床之怨妾抱焦桐



而夜鳴倚銀缸而宵快寒徘徊兮金柝露漙復兮玉除  
觀征鴻之長去懷戰馬之焉如夜夜玉關之羌笛年年  
錦字之鄉書斜度交河而風縮高喚空閨而月虛冷鐵  
衣而不卧嚙玉筋而恒啼恨賁鴻之雙落憐孤雁之獨  
棲碧玉相思之女黃榆遊冶之兒盡低徊而掩面或慷  
慨而沾裾況夫躑躅長途飄流異域瞻古道之悠悠轉  
中心而脉脉顧清影而相憐應曼聲而下泣灞亭射虎  
而醉歸青海牧羝而夜哭憐故時之將軍弔未歸之屬  
國亭尉相呼雁書無策渺浮雲之可託遙江關而靡極  
茫茫河海兮征南遶遶雲山兮向北洞庭之水千里九

疑之雲一色飛飛去兮衡陽浦望帝子兮長太息

紅蓮落故衣賦

余池有蓮秋而憔悴哀而賦之以詩句爲題用

王盧體

歎江國之芳菲鶯花駐其流年懷風流之在昔接聯翩  
之少年春風折柳秋江采蓮柳弄色兮非一蓮相思兮  
可憐分澄波之淡淡秀荷葉之田田羅裾蕩槳玉腕移  
船麗人宛宛兮既往愁心脈脈兮誰傳爾其容華嫣然  
艷陽不再搖露珠而猶圓含月華而如醉風來明漢女  
之璫雨過滴鮫人之淚一枝則春恨千絲並蒂則秋波



百媚承公子之餘歡託湘君之解佩且以污泥妙質塵  
霧清光紅因宿粉翠欲回香蓮分心苦藕斷絲長晨食  
沈蜜夕沐芬芳綠寒鸚鵡紫亂鴛鴦何涼颺之秋晚遂  
零謝於池塘嗚呼菡萏先零芙蓉已暮柔恨未舒芳情  
非故星歷歷於銀河秋迢迢兮玉樹紅粉落其晚風綠  
衣驚其墜露同團扇之棄捐希君王之一顧乃爲歌曰  
衰柳參參兮秋始波美人日暮兮採蓮歌南湖羅綺兮  
爲誰歌蓮房墜粉兮傷如何

冰池如月賦

用謝宣城句

越朔風之振地冰漸漸其腹堅金鑪乍煖翠衾不眠爰

問梅而送臘睠徘徊於庭前何小池之明潔恍積素之  
瓊田非玉壺之晨澈仰冰輪之夜鮮光搖搖而不動影  
淡淡而如懸抱明虛受含淨光圓曉避浴淵之日宵分  
入水之天方諸廣照飛鏡流妍爾其寒逼簾疏明虛芳  
甸散餘霞而成綺捧冰心而拂劍飄紅葉則落桂一枝  
映青樓則影娥半面白雁顧影而欲驚素鷗拳足而如  
見鴛鴦宿而對語雙雙翡翠棲而流光片片似迴雪而  
疑虛類凝霜而難踐惟冰玉之澄華與太陰之宵練實  
漾碧而搖青固參差之相眩於斯時也空房棄妾獨戍  
行人翠衣霜雪半枕風塵明水寒而衣袖薄華月度而



關山深睡鳥煙冷老馬霜侵咏苦寒於長夜懷遲日於  
陽春我傷如何勞勞至今嗚呼秀月澄冰迢迢清泚今  
古同然悲歡如此三冬幾何春光載起陽鳥集於江關  
潛狐聽於波底條風舉而太陽明蕩漾一江之春水乃  
爲歌曰冰池如月麗影娟娟東皇微扇春明自妍塵澤  
已化靈河在天北風雖勁何日長年  
端午賦  
爾迺矩持炎帝方司祝融朱明日永麗節天中陳柯槪  
其蕤露柔條扇其景風綠泛麥秋黃分梅雨涼月隱而  
納涼愁霖深而清暑度九秋之逝光忽五日之令序晞

光拂其蕙晚臯陰休于蒲塘丹李垂實素燿成行泛崇  
蘭而欲落聞鳴鳩而不芳雪垂黃鶴之風水變丹魚之  
浪語鴝鵒而新調採蟾蜍而相望桃似人形艾皆虎狀  
當江南之芳景極榜汰之水嬉彩鷁雷動錦帆雲齊魚  
龍駭神靈疑亂汪洋之淥波撥容與之雙槳相逢蓮葉  
之西共泛星槎之上吳姬抗腕而御橈越女停雲而振  
響啁啾四發欸乃一聲曉泛而露荷如拭晚歸而月柳  
微明長洲空苑闌闌孤城家家竹枝人人桃葉紅回繫  
臂之絲青留鬪草之襪繞腕則條脫雙鈎泛酒則菖蒲  
九節屯兵革之閑酷邁鄉關之亂離愁中風俗夢裏歲



時寂寞鄴中之贈彷彿江州之儀地臘誰傳方舟不渡  
今年之朱索空纏去歲之赤符已破蘭非可浴之湯艾  
無可懸之戶蕭條佳節慘淡餘生盤中角黍杯底梟羹  
縷非續命繒誰厭兵興懷抱石之貞未遂投江之孝感  
慨烏鳶之歌反覆龍蛇之調家國煩冤形神相弔嗚呼  
三廢有恨百贖何身雖年年而祭屈或處處而祠陳魂  
歸來兮未定哀江南兮幾人

九哀

曜靈

曜靈落兮蒼梧浮雲沒兮瀟湘波帝子屈兮玉鸞徂笑

蓉萎兮秋水多南翹首兮重華九疑綿連兮路遐靈輿  
蹇兮亭亭薜荔旗兮蕙旌兩瀾瀾兮山青波潺湲兮閭  
鳴三秀折兮公子來秋草綠兮王孫歸佩珊珊兮來遲  
露瀼瀼兮未晞左青瑁兮右素威蓋玉芝兮療饑左右  
盼兮光遺青霜激兮陽景微睠瑤琴兮般淫裔哀弦急  
兮淚沾衣

思羣公

玄雲流兮閭闔開龍車駕兮神仙來靈焱發兮蕩九垓  
緒颺橫兮相徘徊索瓊漿兮進玉醴蕙肴陳兮蘭席啟  
神悅悅兮栗子體左徐侯兮右吳黃震天鼓兮揚燦芒



止桂旌兮登玉堂前後疎兮軼曼光鞭飛廉兮御豐隆  
叩天門兮道蒼龍日旦兮月融融三江遠兮木葉落  
思羣公兮悲風作巫咸進兮筵篋告空山靜兮深鬼哭

南浦

桂楫兮蒙衝鱗鱗兮海東錦帆兮張風綺綢兮凌空超  
天河兮銀漢通光迢迢兮澗渤窮谷水兮秋始波韞沛  
兮馳虛無橫海兮伏波百神森兮星羅焱回兮虛徂  
鸞警警兮神過南浦泛兮帆檣集長劍斷兮寶刀澁天  
策隱兮旄頭急玉冕裂兮錦裘失胡笳動兮樓船敗從  
魚龍兮沉江海雷師訇隘兮雨師灑軼無形兮排玄霧

象輕煙兮激雲水翳窈窕兮哀山鬼

結玉芝

擘木蘭兮芳洲結玉芝兮瑤圃睠四顧兮徘徊余何爲  
兮荼苦芙蓉萎兮西江蘼蕪衰兮南浦冠岌岌兮高冠  
佩陸離兮朱組橫四海兮皆狂

歡醜

兮揚波余不忍兮改此度哀靈修之已化兮慨皇輿以  
跼步鴟鳩鳴兮鳳衰歸丹山兮鍛羽捐子玦於澗濱兮  
投子環兮江滸紛總總兮陸翹路漫漫兮修阻望故鄉  
兮夔然羞瓊粳兮上下

雲中遊

雲中遊

夏內史集卷二

古



秋飈動兮玉梁芳草萎兮河陽綠滋謝兮變黃朱華  
兮負霜彼衆鳥兮安翔獨孤鳳兮遑遑寥泐天高兮憤  
恨淡偃蹇兮懷上皇哀美人兮旣亡彼蚩蚩兮爲朋旣  
冉冉其遲暮兮寧信修之可忘結三秀兮寒芳怨景暉  
兮逸光鸞啾啾兮爲從驂離離兮飛龍佩瓊枝兮訪有  
娥蹇修兮未我通君王去兮遊雲中懷膏沐兮誰爲容  
雖鳩媒之善辭兮羌予心之未同

臨清流

桂楫兮迎瀾葯房兮內寒泛輝兮崇蘭沐照兮輕紈期  
美人兮江干奏清徵兮玉蘭清霜發兮裳衣單懷脉脉

兮寡歡美人未至兮露溥蔓草平兮漫漫蕪城暮兮長  
歎狹冥冥兮空山藪蕭蕭兮哀湍萍何爲兮崖際鶴何  
爲兮林間臨清流兮濯冠愁日暮兮潺湲

秋士悲

虎豹兮踞天門掩朱明兮景淪橫千里兮氤氳城闕兮  
蔓草野郭兮青燐秋卉凋兮傷心秋陽匿兮愁霖瓊戶  
玉閣兮爲薪珠簾翠棟兮爲塵蛾眉曼睩兮黃土綺心  
蕙質兮平莽噫吁嚱兮哀以楚秋士悲兮弔今古望靈  
均兮南浦楓湛湛兮江水多哀江上兮光景徂日曼光  
兮流層波



三江波兮木葉脫孤雁噉噉兮起天末秋氣高兮肅清  
激流霜兮哀越楚歌終兮吳歛闕吹玉笙兮卧明月援  
瓊枝兮偃蹇佩瑤草兮百結乘余馬兮駕余車鸞啾啾  
兮為我驅哀王孫兮歎路隅朱門閉兮狐鼠居生煙漠  
漠兮當玉除天陰陰兮新鬼趨石馬呼風兮猿嘯雨日  
月匿光兮神靈語予將排閭闔兮入帝所告天皇兮玄  
之圃左玄螭兮右蒼虎射旄頭兮于北街乎飲羽無使  
王孫兮久荼苦

望首陽

廖廓兮秋天肅而氣高搖落兮草木變黃于亭臯長玄  
夜兮晦晦思朱陽兮昭昭天淫淫兮降霜大塊動兮秋  
潦朱華零兮冒平阪但聞訇磕兮懸洪濤三江壯兮滔  
滔魚龍舞兮神靈號金支翠旗兮馮夷朝黃鵠之羽離  
離兮而尾脩脩登高林兮泛巢雲茫茫兮浮天失地而  
廖遙召豐隆兮招玄冥驤龍首兮凌扶搖叩英皇兮訪  
有姚濫靈颺兮不可招東望首陽兮有蕨復有薇玄馬  
黃兮僕善饑橫絕四海兮將何依 啟關蔓草生階墀行  
行馬蹄疾去去車輪遲 復遲遲雲無還時南枝越鳥鳴慰我長相思



藝海珠塵  
夏內史集卷三  
一

藝海珠塵

南滙 吳 省蘭 泉之輯  
華亭 姜 兆翀 如三校

夏內史集

夏完淳篋

卷三 五言古詩三十三首

擬古

春風動衣袂榮露含綠滋十日不啟關蔓草生階墀行  
行馬蹄疾去去車輪遲疾者日以遠車犖苦不脂遲遲  
復遲遲浮雲無還時南枝越鳥鳴慰我長相思

藝海珠塵

夏內史集卷三

一



雜感

陽暉遲以永細草知春發徬徨悲無依仰視浮雲沒凝  
 睇忽有遺所思在天末遠道勞夢思素書通契濶欲往  
 從南風路遠山川越春仲以為期芳樹綠滋歇日暮人  
 未來瓊枝慰飢渴  
 端居戚不歡階草綠堪採夜起瞻天樞春仲玉衡改河  
 清安可期冉冉將誰待天高山鬼哀窈窕塞芳蒞月明  
 風蕭蕭披襟思忼慨恨無雙飛翼飄飄凌滄海振衣登  
 蓬萊飢芝壽千載

六哀

徐冢宰

石騏

忠襄老成人夙昔抱明哲秉鈞右天子貞簡懋嘉節滄  
 海副車空平陵鼓聲絕五朝有遺則景光亘千葉遺恨  
 楚社墟秦仇竟誰雪高山流清音一往風益烈

侯納言

峒曾

忠烈簡邁姿淡然青雲志三鳳齊雛鳴修羽拂雲際孤  
 城戰苦時日落鼓聲死始知朝陽禽亦復秋飈厲六翮  
 鍛不垂靈風滿天地興懷慕義悲言洒西州淚

黃鎮南

嵩

鎮南三萬師家世遼西將秋風捲大旗落日滿牙帳五



湖駕艨艟吞波偃風浪大功一戰摧弧矢 壯將星  
落南浦夜半旄頭抗衰草白茫茫風雨肅遺像

吳都督

志葵 王蘭泉昶云吳志葵字昇階呂巷人少負壯氣與郡兒戲輒自稱將軍為隊伍頗有法贅於陳陳氏世業賈多秦晉游俠之客膾炙人口說劍投石超距與志葵相得甚歡學穰苴孫吳兵法中崇禎癸酉武舉會試不第嘗謁前門關廟舉青龍偃月刀舞於衢觀者如堵由是名動京師東陽張國維巡撫江南委署金山營把總乙亥二月流寇犯安慶以標兵五千人為前鋒身被重創中四矢潰圍力戰擒賊家口奪其騎而回累官坐營遊擊將軍以防禦功拜左軍都督僉事充總兵官鎮守吳淞頗著威信海商賈不敵相賊殺是冬晉都督同知明年秋八月大兵南下敗績被擒九月戮於南京宜仁橋妻吳江范氏自殺

將軍負奇氣膂力恣輕矯持重客一發謀斷苦不早蛟  
龍失大澤千里帆檣倒復楚計不就寶劍埋荒草義士  
五百人同死田橫島靈旗被長風恍惚神靈貌

魯副鎮

之瑛 王昶云魯之瑛字瑟若世襲蘇州衛百戶累官劉河參將南都建號防禦京口遷副總兵駐師福山大兵至蘇州鄉兵四起諸生陸世鑰聚眾千餘屯陳湖中有十將官者亦屯千餘人於左近已而所部有被獲下獄者陳湖之師伏力士却之焚城樓城中士民應之焚撫按公署撫按亦斂兵於南園之瑛率千人入城與大兵戰眾潰不能支之瑛鬪死有義士韋志斌者亦同死見徐秉義明末忠烈紀實

瑟若輕健姿一往仗奇氣寶劍酬君恩深入無退志孤  
軍矢一戰光響橫振厲忱慨授命時白虹貫吳市猛虎



困樊籠長嘯驚聽利要離千古愁浮雲渺無際

嗚呼先文忠橫劍誓河曲周旋帷幄間指揮百靈伏

逞暴時帳下三千吳從容蹈東海景耀長回燭九京

有同心天門策龍足閔予笑獨人哀哉集荼毒

六君咏

史太師

可法

忠清卓犖姿夙昔事戎馬隆望震華夷嘉名澤風雅金  
臺涕泗中發憤復楚社出師計不就戰死維揚野西風  
五丈原冥冥雲龍駕盈盈陰雨時時見神靈下

黃少保

道周

漳浦介以廉自負韜鈴術風流映古今遺世真獨立戎  
馬非所長振羽入羅罽言從孤竹風忼慨誓絕粒  
雖不成報國心已畢靈旗縹緲間陰飈斬衛律

劉亞相

宗周

劉公執法臣威儀世所則弟子三千人紹興鄒魯跡朝  
野四十年講壇日翼翼一死存太常道宗傳入室周粟  
義不食何況非劉石遺恨歸河山流風邈難卽

徐詹事

沂

文靖黼黻才華國樊述作世稱馬與徐遵道適華朴要



離墓草青勝事空寂寞千載有遺風慨然排冥漠始知  
風雅儒大勇甘清壑靈旗動虛無清暉宛如昨

金司馬聲

司馬盛意氣豪舉不可親翩翩雲中龍渺忽誰能馴牙  
旗風蕭蕭慟哭驚鬼神輕生責任俠英爽殊逼人功名  
盡一劍壯志苦不伸縱橫一世間卓犖誰比倫

祁中丞彪佳

中丞多風姿簡貴出塵表修飾好羽儀凌雲獨矯矯方  
圓表裏間立朝氣清沓曹娥千載流忠孝頗同調瞻言  
從彭咸乘風駕縹緲先人在九原頗憶當時好

送別

馬秣車已脂借問君何之青青山陰柳是君上馬時我  
有雙玉環宛潤好顏色佩君衷裏衣明我長相憶置酒  
臨江臯贈君以敝裘敝裘不為薄願君思同仇日落星  
爭光行人不知處前山馬首迴掩涕獨歸去

倣古

月出西南樓流光入幽室盈盈十五女綽約好顏色素  
手響金徽一彈三太息激楚變清商悲惋難自抑本以  
待遠人所遇非疇昔薰風蕩羅帷卧懷行旅客夢中迷  
遠道誰能辨南北飛禽習習還疑是君行跡征雲無歸

夏內史集卷三

五



期徬徨淚盈臆  
 贈廣武申大孚孟  
 君家漳水邊意氣冠河朔英爽殊不倫酒酣高歌作易  
 水白日寒千秋事蕭索恍慨希古人璠璣隱藜藿葉家  
 入江干裘馬盛揮霍天紀闇不章棲樓靡有託行行東  
 南征舒此伯玉畧出門成侯王閉戶死溝壑觀茲乘風  
 便始信無家樂  
 望家園作  
 流觀窮四野草木蕩綠滋漠漠崑山陽浮雲來間之一  
 葦不可杭白雲空相思落霞依故山落葉依故枝無知

尚思歸何以慰有知

敘懷

曰余廓落姿逍遙忘所務願從濮上遊敢望隆中顧高  
 蹈山阿人荷衣守遲暮蘭蕙明曲阪苔蘚昌幽路丹霞  
 照深池清暉被嘉樹服食希神仙誦讀羞章句黃金竟  
 不成朱顏為所誤言念往昔者始知新人故  
 漢女婉孌姿樹蘭紉為佩芬芳希娛人入宮反見罪出  
 門無同心深言徒自悔冉冉遲暮憂殷殷忽如醉疎者  
 日以親賤者日以貴菜蔬蔓依人幽草自憔悴



懷母詩二首

歸昌失其雄挾此孤鳳雛青鳥翩然來同上增城阿湯  
飲瑤池泉饑食玉山禾孤雛巢梧桐朝夕憂斧柯西顧  
千萬里欲往道路多枯桐化荆棘哀鳴當奈何

中庭有玄鶴絕吭長悲鳴浮雲為徘徊悲風淒以清一  
朝入嵩山餐霞弄石英翱翔羽客間九轉得長生遺雛  
在樊籠宛轉多商聲六翮猶未修何以萬里征言念靈  
鳥質傷我勞人情

東荆隱女兄

余也寡兄弟獨有賢女兄周旋襁褓間恩勤靡與京始

將閨極齊豈止手足情耿耿黃鵠哀君子徒生平空房  
淚如纈睠言撫孤嬰敦此舅甥誼何必姬與嬴今余十  
六載狼虎紛縱橫烽煙隱蔓草不見雲間城相去一葦  
遙無由託衷誠汝也奉慈母真詮炳幽貞五難脫塵網  
一視順死生行見大道成翱翔歸太清

夜宿山館

炎暉熙自南凱風豫以款水仙未成調廣陵已絕散明  
月入幽林朱霞冒平阪碧澗疑煙浮翠雲入嶺斷言彈  
邱中琴綺獨山阿館淒淒楚歌急悠悠越吟緩所以玄  
夜遊清酌不能滿



自歎

功名不可成忠義敢自廢烈士貴殉名達人任遺世自  
愧湖海人卓犖青雲志雖無英雄姿自與儔伍異美人  
來何遲景光日云逝誰不誓捐軀殺身良不易百年在  
一旦神仙安可冀榮名復何為寂寞千古事

秋懷

魏馬平坤云存古秋懷諸  
作非謝非韓游衍自得

祝融避炎陸金天肅秋駕玄蟬響高樹鶻鳴深榭朱  
華承露凋豐草昌風謝蟋蟀徧東榮素河轉西野自愧  
蒲柳姿奄忽從物化久視多所悲疇能竟長夜  
涼風何瑟瑟吹我遊子顏歷歷江上林流蟬鳴其間浮

雲西南征一去何時還駕舟凌洪波杖策窮崇山君子  
不遑息小人豫以間感激在溝壑敢念徒旅艱中夜起  
百憂勞人獨長歎

秋色從西來風物自淒緊金飈辭炎暉玉露戒商軫  
鴉薄暮鳴幽蘭望秋隕零落在一時榮華若朝菌高從  
巢父棲下與壺公飲靜觀百歲間無名以為準  
新月鑿我帷頽陽入人衣夕霞自相逐暮禽參差歸  
芙蓉舒方渠鬢鬢含綠滋盛時不及採秋霜來悴之榮名  
固有期恨非少壯時獨行道路長遠行恒苦饑言登西  
山趾餐彼蕨與薇



耿耿秋夜光雲中觀靈匹漢陰無報章河陽有棄輓霧  
裾結雲鬟瓊佩何歷歷佳期匪綺節妙會乃涼夕微露  
鮮玉枝輕颺動雕翼餘光歛欲馳流景逝已迫黃姑九  
秋期發女三光隔髣髴靈駕迴參差空夜織  
愁人不能寐羅帳含月光涼風吹芙蓉習習生金塘絡  
緯鳴參差瓊露凝玄霜柔條日以勁瑤草不復芳盛衰  
各有時憂來浩無方玄髮忽改白使我身世忘

精衛

北風蕩天地有鳥鳴空林志長羽翼短銜石隨浮沉棠  
山日以高滄海日以深媿非補天匹延頸振哀音辛苦

徒自力忱慨誰爲心滔滔東逝波勞勞成古今

歸愚云此淵明

詠荆軻作也

南雁 吳 省蘭 泉之輯

華亭 張 興 金冶校

夏內史集

夏完淳集

卷四 七言古

青樓篇與漱廣同賦 王叔云錢熙字漱廣嘉善人

不尚芬華文極性豪逸絲竹滿堂飄蕙香徐影無所懼其詩歌刻意漢魏初盛唐李廣



藝海珠塵

南滙 吳省蘭 泉之輯

華亭 張興鏞 金冶校

夏內史集

夏完淳纂

卷四 七言古

青樓篇與漱廣同賦

王昶云錢熙字漱廣嘉善人

不尚芬華父梅性豪逸絲竹滿堂熙焚香縱

帳如無所視其詩歌刻意漢魏初盛唐孝廉

徐彬臣歎為洗馬當年二十七卒妻鄒年

二十四而寡子未周歲遭亂崎嶇卒成孤完

藝海珠塵

夏內史集卷四

一



長安大道平如組青娥紅粉嬌歌舞南北紅樓幾院開  
行人爭誦平康譜明鏡春風典鷓鴣金籠夜月嬌鸚鵡  
天涯遊子憺忘歸畫船處處生簫鼓有時玉闕朝諸侯  
有時金門徵羣流踏青駿馬驕春陌滿地楊花拂御溝  
醒來錦袖飄歌院醉後紅牙唱酒樓小婦親陪青玉案  
貴人盡脫紫貂裘燕趙美人顏如玉兩行珠翠嬌紅燭  
翠管金箏太液池鈿蟬金雁邯鄲曲綺帳初回倚碧鈎  
瑤琴欲撫吹金粟宛轉橫敲碧玉釵娉婷卻買明珠斛  
神宗垂拱放官衙南臺北里七香車鳳凰對策呼名妓  
獬豸彈冠擁狹斜王孫夜夜珠簾坐公子豕家玉樹花

樓頭檀板憐青綺巷裏銀鐙拂絳紗三吳年少多遊冶  
筵前戲抱當鑪者金錢夜解石榴裙丹髮朝賜桃花馬  
風動雙鬟翡翠床霜封一片鴛鴦瓦對月還疑蘇小來  
撫琴偏似文君寡二十年來事已非不開畫閣鎖芳菲  
那堪兩院無人到獨對三春有燕飛風絃不動新歌扇  
露井橫飄舊舞衣花草朱門空後閣琵琶青冢恨明妃  
獨有青樓舊相識蛾眉零落新頭白夢斷何年行雨蹤  
情深一調留雲跡院本傷心正德詞樂府銷魂教坊籍  
爲唱當時烏夜啼青衫淚落江南客

東風楊柳怨和錢大



東風吹度春江曲大堤花草參差綠昨宵煙雨盡傷心  
今日鶯花空滿目有客扁舟迴自傷一江春水半垂楊  
始知啼鳥皆牽恨不是征人亦斷腸千條深鎖垂芳甸  
絲絲盡拂行人面曉氣疑籠汴水堤春光不散靈和殿  
猶想當年全盛時江南芳景駐遊絲踏青寶馬香車疾  
載酒樓船畫槩遲公子金鞭競相送五街七市遊塵動  
爭看飛絮蕩春風卻惹落花迷小夢到今羅綺古揚州  
不辨秦灰十二樓枯柳不知亡國事乘春偏發大江頭  
江南江北愁如帶畫船簫管知何在鳩鵲渡頭微雨來  
琵琶馬上蒼烟外斜陽深處草鱗鱗作客孤帆送遠人

折盡南枝留去馬迴看北雁滿離津當日艷陽今在否  
獨酌春塘一杯酒關情鶯囀章臺路離恨烏啼白門柳  
偏逐輕風上下狂銜來春燕滿空梁酒杯千古思陶令  
腰帶三圍恨沈郎大道如掌春陽靜臨流直掛垂鞭影  
黃鸝夜雨太液池白馬春泥景陽井橫笛城頭不忍聽  
那堪雨色更青青可憐脉脉傷情路最是勞勞贈別亭  
昨夜春江淨如洗幾片楊花落楊子惟有鍾山松柏枝  
春陰憔悴爲君死

過橫雲山

東郊桃李飛如雪春風蕩漾江花發翠閣紅樓水一方



藝海珠塵  
黃鸝紫燕春三月猶想煙花昔日遊誰知羅綺今年歇  
披衣露下月欲斜腸斷枝頭杜鵑血

送人還具區

縹緲峯前東風入萬頃蒼波芳草濕一片征帆遠入雲  
春水茫茫春月出黃鸝紫燕參差飛生煙漠漠柳依依  
三月風光腸欲斷行人何處不思歸洞庭歸客傷心路  
桂楫蘭舟愁日暮碧草連天欲待誰疑煙疑霧斜陽渡  
送君一闋楊柳春銷魂客路水鱗鱗知君憑弔鳴夷處  
一作去 鬖髯吳宮歌舞人

寄懷子留方二

樅陽突兀射蛟臺江流九派大姑來美人娟娟春水中  
徘徊煙霧真仙才錦衣寶劍黃驄客千金一諾重顏色  
與君頗似肝膽交風塵四海空相憶我汝年皆十五餘  
江南江北稱神駒文章一顧雲煙動自愧風流頗不如  
王師已報江州捷上流帆檣如滿月君家羆虎卧江頭  
英姿颯爽真奇絕何年六師呼渡河金支翠華歸京都  
鳳凰臺下璣瑜月重結高陽舊酒徒

易水歌

白日蒼茫落易水悲風動地蕭條起荆卿入秦功不成  
遺恨驪山暮煙紫昔年此地別燕丹哀歌變徵風雨闌



白虹翕翕冠燕市黃金臺下陰雲寒袖中寶刀霜華重  
此專千秋竟成夢十三殺人徒爾爲百二河山儼不動  
嗚呼荆卿磊落殊不倫漸離慷慨得其真長安無限屠  
刀肆猶有吹簫擊筑人

博浪沙歌

東海波翻白日動秦讎慷慨天門慟滄海先生矢報韓  
博浪沙頭風雨闌祖龍日觀登封還金泥玉簡嵩高山  
道遇沙中鼓錘者副車決裂龍旗下此時一呼乾坤震  
大索十日神龍隱秦亡朱組繫子嬰三戶復死韓王成  
芒碭五雲天子氣遇留風雨蛟龍意垓下烏騅楚霸王

鎬池白璧秦皇帝嗟乎哉大讎旣報奇功收拂衣願從  
赤松遊英風颯爽滿天地素書三卷在人世

南越行送人入閩

古南越武夷天姥神靈穴滄茫八柱倒江河沆漭三桑  
扶日月況值中興定鼎還龍趨虎躍參差間誰人奇遇  
君臣際不願追隨俱奉班知公意氣一世無當時寄興  
真龍雛靈意九重方玉汝天恩一命執金吾五侯爭逐  
真人意白璧黃金富民第萬歲蓬萊舊羽林五雲驃騎  
新司隸此去長風度滄海天吳海若朝宗會爲送鄂君  
青翰舫翻思漢帝金根蓋浮雲何事盡南征濛濛行在



不勝情第一樓爲龍虎關內三山作鳳凰城五年客邸  
曾遊所別來風景殊今古春城煙霧入樓臺曉日雲霞  
動旗鼓此日東風送客塵車如流水水鱗鱗點君兩袖  
霜華淚倘憶羈遲異國人  
賦得王叔明武夷春色圖送閩人  
黃鶴山樵高卧起落筆雲煙千萬里畫作武夷春色圖  
七十二峯煙霧裏登山臨水送將歸悲莫悲兮生別離  
芳草連天明月出空山落照白雲微故人辭我南天去  
海東雲接漳江樹錦樹飛花把酒時綠楊歸路傷心處  
茫茫異域送南征兩淚如絲生別情武夷空翠如天際

夜夜隨君夢裏行

寄后張

后張工  
爽字

千山萬山芳草生千樹萬樹黃鸝鳴汝爲高堂不得來  
我爲高堂不得行寂寞音書竟塵土昨聞後江新破兵  
欲眠不眠愁夜半橫笛參差三兩聲

蔣生南行歌

案蔣大鴻名平階以順治  
丁亥亡去赴閩事唐王者

與君自別新寧邸世事渾如翻掌異馬江潮入大玉風  
旗山雲作真人氣我子風流世所知南瞻天闕更驅馳  
九死不回歸國意百年重見中興時登山臨水車塵絕  
海水天風恨離別飛飛征雁五溪雲行行立馬吳山月



離亭尊酒白雲飛送子終宵露滿衣啞啞烏啼飛上屋  
參橫斗轉星河稀

故宮行

朝登建康城暮宿丹陽道黃塵落日大江流紫陌微寒  
故宮草故宮煙雨動新愁華屋參差成古邱當時羅綺  
三千戶何處鶯花十二樓六代繁華如在眼真龍不動  
河山轉春光縹緲景陽宮月色徘徊芳樂苑細雨深宮  
花落遲輕風合殿香飄遠花香十里到平康莫愁歌舞  
冶遊郎俠少盡騎青絡馬交遊爭繫紫羅囊鴛鴦兩兩  
芙蓉沼鸚鵡雙雙玳瑁梁一朝景物如反掌富貴風流

竟長往玄武池邊暮雨來朱雀門前春草長美女琵琶  
塞上行綺構雲連空復情人夜雨烏衣巷歸雁秋風  
白下城登臨千載空回首陳井梁宮竟誰有遊鹿爭銜  
上苑花流鶯自轉臺城柳臺城下接孝陵西無限枝頭  
烏夜啼楊花風起過江去薄暮如煙滿大堤

送偉南南行兼訊王玠右

鍾開雍字偉南當乙酉時去之浙下築東

義間此南行詩所為作也後偉南留張玉簡  
署中故松郡丙戌丁亥之變不之及時人因  
有卧龍之目至王玠右則奉其父君謨先  
生之官浙中遂留在浙故有兼訊之語  
壯士賦無衣孤舟入翠微南風渡南海帆上白雲飛吳  
松江上浪花白故人分手泐沾臆海天飛盡故鄉雲惟



見蛟關暮山碧去入長空疾似無平津東閣紫雲策  
馬爭看紅鞵鞞駕舟欲釣紫珊瑚羨爾千金生意氣  
芙蓉闕下空羣驥赤城梁外見王生幸君道復殷勤意

長歌

我欲登天雲盤盤我欲御風無羽翰我欲陟山泥九九  
我欲涉江憂天寒瓊弁玉蕤珮珊珊蕙燒桂棹凌迴瀾  
澤中何有多紅蘭天風日暮徒盤桓芳草盈篋懷所歡  
美人何在青雲端衣玄綃衣冠玉冠明璫垂絰乘六鸞  
欲往從之道路難相思雙淚流輕紈佳肴旨酒不能餐  
瑤琴一曲風中彈風急絳絕摧心肝月明星稀斗闌干

題曹溪草堂壁

崑山之陽谷水陰其中青翠深沉沉美人結廬在何許  
松花濛濛翠微雨曹溪九折抱煙扉草堂天半白雲飛  
挾策盡爲門下士登壇半是里中兒風塵四海事戎馬  
角弓寶劍珊瑚把新堤桃李爭春風連錢駿馬桃花紅  
江頭義師黃石法門前健兒水犀甲壯遊不讓五陵豪  
酒酣却笑三河俠誰知頃刻雲雨翻死生漂泊煙波間  
舊時部曲尊前散昔日煙花夢裡攀沈沙一死千虹氣  
遺恨哀哀蓼莪廢何地重開北海樽無人更洒西州淚  
珠履三千食客稀玉盤十二齊盟悔我今亡命滄海遊



何年佩刀成報仇惟有園中雙白雀日日曹溪沙上啄  
啄魚不得歛歛飛飛入園中啄紅藥

霸圖

清角一聲秋色裏玄霜白荻將軍壘紅旗半掩轅門紫  
落日餘黃鼓不起英雄霸圖今已矣醉攜吳鉤爲君死

翠華篇

此追紀聖安皇  
北作也

北馬如雲動地來御舟太液採蓮回玉腕蛾眉遲不動  
金鞭鐵騎暗相摧九門龍馬夜銜勒魚鑰沈沈靜如拭  
平旦千官上殿來螭頭羽扇無消息白鷺洲邊駐綵旌  
鸞輿已幸靖南營燕姬吹笛眠金殿漢將降戎到石城

紫駟十萬分旗獵孝陵草木青煙歇芳樂苑中啼鳥稀  
景陽宮外行人絕綠沉重甲右賢王將軍匹馬來相當  
獨壘天青江月白孤城戰苦陣雲黃烏啼城頭風簸簸  
八千子弟帳下哭君王銜璧出轅門落日悲風滿如孰

黃鬚秦凱歸

九朱組受降回秦淮渡頭父老泣

閣道車中帝子悲殿前匍匐三頓首明駝快馬追風手  
兩行紅粉舊宮人健兒折盡臺城柳一輛輶車翠華北  
黃河東流聲淅淅愁絕風雲不敢言江南天子黃龍客  
漢宮佳麗抱琵琶皓齒紅顏塞上沙最憐齊殿金蓮步  
恨殺陳宮玉樹花桑田碧海須臾改歌舞流光不相待



夢到當年羅綺場鍾山半落斜陽外

蘆花篇

去時蘆葉碧如染歸時蘆花滿江轉亂逐輕風薄暮飛  
細飄曲水凌波淺頗類瀟湘放逐臣翻似江湖羈旅人  
王孫東去怨芳草公子西歸採白蘋當年羅綺秋光冷  
一聲芳管江天靜到此風塵客子心空留霜月蘆花影  
雁聲嘹唳寒江白漁舟古渡吹橫笛烏啼月落淚滿衣  
秋水連天獨歸客

明妃篇

紅粉三千貌不同傾城不買畫圖工夜夜秋光長信殿

年年春色未央宮忽聞詔選賜匈奴絕代良家請嫁胡  
錦袖乍嬌紅鞵鞋金井長辭玉輓轡如花慷慨遊金闕  
紫臺薄命音塵絕環珮朝辭漢殿雲璿瑜夜舞交河雪  
寶馬行行歸朔漠酒酣還奏宮中樂單于帳裏月華高  
燕支山下花光薄銀箏錦拍按琵琶一代紅顏絕塞沙  
待生青塚愁中草始憶昭陽夢裏花

細林野哭南冠

細林山上夜烏啼細林山下秋草齊有客扁舟不繫纜  
乘風直下松江西却憶當年細林客孟公四海文章伯  
昔日曾來訪白雲落葉滿山尋不得始知孟公湖海人



荒臺古月水粼粼相逢相與天下事酒酣睥睨意氣親  
去歲平陵鼓聲死與公同渡吳江水今年夢斷九峯雲  
旌旗猶映暮山紫瀟灑秦庭淚已揮髣髴聊城矢已飛  
黃鵠欲舉六翮折茫茫四海將安歸天地踟躕日月促  
氣如長虹葬魚腹腸斷當年國士恩翦紙招魂爲公哭  
烈皇乘雲御六龍攀髯控馭先文忠君臣地下曾相見  
淚洒閭闔生悲風我欲歸來生羽翼誰知一舉入羅弋  
家世堪憐趙氏孤到今竟作田橫客嗚呼撫膺一聲江  
雲開身在羅網且莫哀公平公平爲我築室傍夜臺霜  
寒月苦行當來

吳江野哭

王昶云吳易字日生吳江人尚書山  
通任俠間爲詩文傳誦士林非其好也崇禎  
十六年成進士不謁選而歸明年聞北都失  
守感憤作恢復議四篇福王立謁史可法於  
揚州可法異其才薦授職方主事監紀軍前  
甚有勞績明年督餉吳中未還而揚州失已  
而吳江亦失遂與同邑孫兆奎沈自炳自駟  
屯軍長白蕩出沒五湖三泖間大兵來討  
易用計沈其舟獲勝時部郎王期昇吳景直  
等奉通城王朱盛徵起兵西山克長興居之  
兵不甚強皆倚易爲助唐王聞之授兵部右  
侍郎兼右僉都御史總督江南諸軍事楊文  
聰奏易斬獲多進爲兵部尚書魯王亦授易  
兵部侍郎封長興伯八月總兵吳兆勝以舟  
師至易出戰塘口復獲舟二萬承緒妻沈氏及  
設備爲大兵所襲大敗父承緒妻沈氏及  
女皆投水死易子身走一軍盡殲明年易鄉  
人周瑞等復聚衆長白蕩迎易入其營巡撫



王國寶遣副將來討為瑞所敗軍聲復振其  
秋易至嘉善與職方倪撫合營集飲孫璋家  
偵者知之嘉善大兵猝至易被執至杭州總督  
張存仁甚重易館於署舍勸以官不應勸以  
雍髮不許戮於杭之草橋門將戮易北面  
再拜曰今日臣之志畢矣時年三十五

江南三月鶯花嬌東風繫纜垂虹橋美人意氣埋塵霧  
門前枯柳風蕭蕭有客扁舟淚成血三千珠履音塵絕  
曉氣平連震澤雲春風吹落吳江月平陵一曲聲杳然  
靈旗慘淡歸荒煙茫茫滄海填精衛寂寂空山哭杜鵑  
夢中細語曾聞得蒼黃不辨分顏色江上非無弔屈人  
座中猶是悲田客感激當年授命時哭公清夜畏人知  
空聞蔡琰猶堪贖便作侯芭不敢辭相將洒淚銜黃土

築公虛塚青松路年年同祭伍胥祠人人不上要離墓





藝海珠塵

藝海珠塵

南匯 吳 省蘭 泉之輯

婁縣 張 允垂 升吉校

夏內史集

夏內史集

夏完淳篋

夏完淳篋

卷五 五言律

卷五 五言律

花朝約漱廣遊鄒仲堅園亭阻風雨有作

欲渡芳洲去蒼茫迴不通樹迎神女雨花避大姨風隔

水同千里浮雲合九峯王孫愁日暮春草碧煙中

寒食掃墓

寒食掃墓

藝海珠塵

夏內史集卷五



遺恨荒原綠東風闐闐開龍蛇知火息鴻雁及春迴芳  
草新煙積輕風舊雨來王裒私教授長起蓼莪哀

偶見荆隱舊莊殘英未落餘露泫然賦示武功

舊日風流地園亭日夜開金樽移草木綺席隱莓苔西  
苑三春靜東風百鳥哀輕花偏不落如待玉人來

四海盡風塵桃源欲問津風來香入座月靜錦成茵花  
鳥酬知己雲山待主人王孫歸去後春色到東鄰

偶與昭南女弟談懷荆隱女兄

不堪春色盡卜宅到江潭空谷傳三隱

余號小隱昭南號蘭隱名

閨美二南荆隱字美南占風知少女鬪草佩宜男遙憶大姑

處天花動草庵

留別

與汝三春別離亭奏管絃鶯啼芳草外燕乳落花前殘  
杏飄紅雨垂楊隱綠煙年年愁滿地此去更淒然

晚眺有憶

不繫扁舟久登臨淚滿纓暮雲山外斷春水月中明蔓  
草雲間戍輕煙海上城佳期空冉冉遲暮若爲情

登樓

極目兵戈際登樓暮轉哀月明揚子渡江鎖越王臺歸  
鳥衝林起輕煙隔岸開五雲飛不盡知是帝鄉來



杖策

杖策獨行吟悠然思故林  
雨來千樹暗日落九峯深  
寂荒煙草迢迢起暮陰  
曹溪何蕩漾猶有白雲心

草堂夏日雜作四首

五月池塘好幽欄木槿開  
羽觴飛乳燕銀甲坐新苔  
黃鳥樽前換青山雨後來  
遠人期未至日暮獨登臺  
歲華忽已半歸國計何如  
落日低秦望青山入禹餘  
滄波空際遠天闕望中虛  
自恨浮生拙臨風欲羨魚  
花草醉醱醱江山恨別離  
浮家隨白鷺行野聽黃鸝片  
雨征帆入孤雲遠樹移  
瑤琴流水意誰是古鍾期

煙水寄輕舸傷心正鬱陶  
朱霞江草動春雨石華高行  
似思鱸膾名猶愧鳳毛  
五湖風色好愁絕水滔滔

重過曹溪

暮雨麗空林黃鸝自好音  
未申歸國意徒有報君心  
戰伐青山在風塵白髮侵  
曲江如有意彷彿翠微深

對月憶南行者

自拜南州使清光幾度看  
滄洲天際晚芳草月中寒  
屬國思歸漢嫖姚擬策壇  
不知江上雁何日到長安

送友北行

故國江山在孤臣意若何  
滄江驚白髮芳草渡黃河  
汝



自懷裘馬余還恨斧柯高皇豐沛地愁絕大風歌  
有作

漢家程不識刁斗拂明霜青翰依藩伯彤箴愧省郎涼  
飈歸細柳旭日自扶桑湖海多豪氣幽懷兩不忘  
得漱廣訃

忽得胥塘訃傷心自白頭龍蛇千古夜猿鶴萬山秋  
亂劉琨恥招魂宋玉愁無情天目水不解向西流  
同恂如因培兩外兄舟宴寄別鑑開家舅

入幕思投筆沾衣愧請纓盤龍呼入陣公瑾笑談兵  
煙樹連雲鷲江湖弄月生一聲離笛晚無限涓陽情

卽事三首

復楚情何極亡秦氣未平雄風清角勁落日大旗明  
縹緲家國戈船決死生胡笳千古恨一片月臨城  
戰苦難酬國仇深敢憶家一身存漢臘滿目盡 沙落  
月翻旗影清霜冷劍花六軍渾散盡半夜起悲笳  
一旅同仇誼三秋故主懷將星沉左輔卿月隱中台東  
閣塵賓幕西征愧賦才月明笳鼓切今夜爲誰哀

歸途夜泊

谷水重遊地悠悠獨此心落星依古戍斜月半幽林  
客散夷門市愁深澤畔吟夜闌人語靜倚檻露沾襟



送杜子皇歸故鄣

分手金陵道相逢倍黯然鶯啼楊柳岸人在木蘭船客  
路三千里征衣十二年計程歸夏口明月兩回圓

旅夜聞雁

旅館孤燈夜愁吟步玉墀秋風人去後煙水雁來時暮  
嶺歸雲斷寒沙落月遲平生湖海意三繞向南枝

哭吳都督六首

星隱中台坼天高北斗斜陣圖傳鸛鶴戰地隱龍蛇故  
壘虛寒月靈旗捲暮霞五湖風雪夜尊酒哭平沙  
幕府歸何地孤臣血未乾杜鵑江月苦精衛海潮寒煙

草空殘壁雲山舊築壇孟嘗賓客散齊缺為誰彈

知已功名盡傷心叩九閭餘光留日月遺恨滿乾坤湖

海門生誼荆榛國士恩滔滔江水濶萬里獨招魂

丞相門誰掃公孫閣不開白龍千古恨黃犢幾人哀江

海猶生氣風塵未盡才雲旗排浩蕩毅魄獨歸來

野哭樵蘇徑浮家戰伐年畫圖空督亢虛塚像祁連白

草荒春月青燐大澤烟漁燈明兩岸猶是水犀船

感交悲故吏纏指痛孤臣有客留滄海無人哭壽春王

孫城下飯公子屬車塵知已今誰報高歌泣鬼神

元日大霧

丙戌



萬里河山氣蒼茫霧不開忽逢三朔至疑有百靈哀漢  
日分南極沙隱大台回中春色滿想像翠華來  
漠漠蒼龍闕黃雲迴不收去年今日事此地昔人愁烏  
雀朝三殿風塵辨九州扶桑新氣象玉冕拜通侯

人日懷舒章

帝京戎馬暗人日故人違御柳金堤是宮花玉燕非傷  
心子山去何日少卿歸猶憶河梁別春風淚滿衣

別雲間

南冠草

三年羈旅客今日又南冠無恨河山淚誰言天地寬已  
知前路近欲別故鄉難毅魄歸來日靈旗空際看

拜辭家恭人

南冠草

孤兒哭無淚山鬼日爲鄰古道麻衣客空堂白髮親循  
陔猶有夢負米竟誰人忠孝家門事何須問此身

寄內

南冠草

憶昔結褵日正當擐甲時門楣齊闕闕花燭夾旌旗問  
寢譚忠孝同袍學唱隨九原應待汝珍重腹中兒

寄荆隱女兒兼武功侯甥

南冠草

門闕推江左孤忠兩姓全十年黃鵠咏三載蓼莪篇愧  
負文姬孝深爲宅相憐大仇俱未報賴爾後生賢

柬半村先生

南冠草



樂今竟如此王郎又若斯自羞秦獄鬼猶是羽林兒月  
白勞人唱霜空毅魄悲英雄先死路却似壯遊時

聞大鴻仲熊南冠草 王和云蘇州府志顧天

崑山人大學士鼎臣元孫延安府推官成正之

子順治三年丁亥上海諸生欽浩通款舟山疏

吳中忠義士二十三人首及威正乃與同事四

十餘人並死天達兄弟亦以藏陳子龍故俱死

叩闕應有路兄弟竟齊遊盱眙同時盡哀融一日收黃

壚人已變清淚夢中流如赴增城約停驂待楚囚

毘陵遇轅文南冠草宋生裘馬客忼慨故人心有憾留天地為君問古今風

塵非昔友湖海變知音洒盡窮途淚關河雨雪深

被羈待鞫在皇城故內端宅南冠草

孤臣魂已斷况復見長安歌舞愁雲散池臺落日寒重

來中貴宅空掛侍臣冠一片銀鐙影還同劍佩看

御用監被鞫拜瞻孝陵恭記南冠草

城上鍾山色松杉落翠微朝光羣鳥散暝色二龍飛壁

月沉銀海金風翦玉衣孤臣瞻拜近泉路奉恩輝

七夕步蠶水先生韻

忽然秋滿地愁裏度良辰有酒還同醉無衣豈獨貧月

明河鼓動露落海闊新欲就君平卜升沉數未真

寶帶橋



連天芳草青極浦獨揚舸歸雁舟前落愁人夢裏聽花  
光明曉霧波影亂春星欲訪靈威穴孤帆入洞庭

順天

舊時雙闕曉陰雨翠華來白玉螭頭仗黃金駿骨臺宮  
雲浮睥睨殿月鎖莓苔太液波翻後魚龍夜夜哀

應天

吳楚茫茫盡神靈日暮趨大江春水濶京口夜雲虛芳  
草三山恨斜陽六代餘孝陵回首處慘淡斗牛墟

西安

無恨章臺柳行人幾度攀秦人空四塞漢殿鎖三關荒

草龍蛇圍浮雲虎豹閑雁飛銀海瀉千古恨驪山

開封

豫州千里國京闕萬年宮北維周謨重東都漢武雄梁  
園秋竹雨漳水夜臺風歌舞西陵歇黃河落照中

臨淄

青苑名藩地臨淄十萬都秦碑沉古壁魯殿入平蕪日  
觀春綿渺天門晝有無黃河如帶白千里自模糊

太原

高接天關險恒山入晉難黃雲知塞近白草入春寒龍  
首河三折羊腸路九盤長垣欣不落寶劍為誰彈



成都

巴字三迴國成都萬里橋雙江春浦漲一帶曉天遙青  
鳥高唐雨黃牛灩澦湖升沉虛寂寞小市竟蕭條

武林

錢塘佳麗地楊柳露新條吳越分煙樹江山擁絳霄月  
明蘇小墓風怒伍胥潮滿眼滄波急旌旗鎖寂寥

秋夜感懷

登樓迷北望沙草沒寒汀月湧長江白雲連大海青征  
鴻非故國橫笛起新亭無限悲歌意茫茫帝子靈

代人贈鎮府

頒封周正朔承制魯元年再造由人力中興賴爾賢山  
河分爵土嵩岳任藩宣德以君臣協才非文武偏六轡  
還鎮解八柱獨承天日月雙珪合乾坤一氣懸上公分  
劍履大將駐旌旃外宅三千隊中軍百六一作八百掾鮫皮  
橫海節犀炬伏波船金角催鳴鼓牙旗滿控弦帆圍江  
月小陣濶海雲連每御黃龍出齊歌朱鷺旋禹餘糧載  
圯秦望石生煙鎮海遙通蜀藩封直到滇投膠均下伍  
彈鋏滿中涓位在通侯長身為諸將先如雲起吳越指  
日度幽燕渤海宜銘石狼胥更策鞭扶桑扶日上大樹  
大風前陰雨膏羣姓晞陽被九泉元功存社稷遺澤在



藝海珠塵

山川方叔基常武言歌江漢篇

插柳

千條拂翠微雨後碧新肥却憶靈和殿楊花滿地飛

藝海珠塵

南匯 吳省蘭 泉之輯

婁縣 王朝恩 笙蘇校

夏內史集

夏完淳篋

卷六 七言律

讀陳軼符李舒章宋轅文合稿

十五成童解章句每從先世託高軒庚徐別恨同千古

一作蘇李交情在五言雁行南北誇新貴鷓首西東憶

故園獨有牆頭憐宋玉不聞九辨弔湘沉

藝海珠塵

夏內史集卷六

一



春興同錢大作

上苑東風試早鶯，故宮依舊百花明。  
江帆入鏡移瓜步，朔馬如雲走石城。  
金鼓平陵憐翟義，旌旗滄海葬田橫。  
傷心終夜看牛斗，醉把吳鉤萬里行。

自憐十載悞儒冠，獨釣滄波行路難。  
雨後新花宜夜醉，月中寶劍試春寒。  
臨江煙樹分吳壤，隔岸旌旗擁漢官。  
聞道扶桑天子氣，何人不向五雲看。

池塘楊柳綠陰垂，煙雨飛花滿院悲。  
三月曉迷吳苑路，萬年春靜禹陵碑。  
江湖夜夜呼精衛，草樹山山哭子規。  
最是關情無限恨，胡笳偏向月中吹。

谷口桃花何處是，武陵猶有避秦源。  
江頭禾葛供勾踐，堂下幽蘭祭屈原。  
春夢却隨千里雁，夜愁不斷萬山猿。  
今年寒食昌平路，蔓草東風十四園。

萬頃滄江未卜居，風塵生計問樵漁。  
錦帆寂寞吳趨曲，石室淒涼越絕書。  
回首故鄉春夢裡，傷心荒草夕陽餘。  
南朝鐘磬三千界，一帶蒼煙散紫虛。

河山風景淚堪揮，江上傷心對夕暉。  
蜀道盡悲諸葛死，漢家猶望少卿歸。  
五湖義士蓮花劍，七郡良家柳葉衣。  
結客少年情不淺，平林裘馬放春圍。

建業河山萬里遙，煙波天際出金焦。  
星辰夜隱移南極，



江漢春翻鎖北條羽獵自高京口樹鶯花不度廣陵潮  
琵琶馬上愁胡語青塚年年恨未消  
片帆春色滿江湖震澤神靈動有無曉氣橫開連百粵  
晴光迴落見三吳飄零煙雨招漁父躑躅風塵問酒徒  
知爾中宵沉醉後寒霜長嘯拂伊吾

錢長孺三春臥病合卷而起詩以嘲之王本題下有借

字或長孺名也

九天環珮石榴裙翠幌妝樓謁細君花入珠簾紅雨過  
香通霧縠紫煙分秦樓曉出東南日巫峽春歸朝暮雲  
賦就感婚縞渴疾不須重作釋愁文

夢懷長公郭侍御五竺崔舍人

乾坤戎馬倚吳鉤猶憶當年太姥遊夢裡雲霞雙鳳闕  
醉來煙水一漁舟窮途知己誰青眼歧路傷心已白頭  
遙想天南新侍從茫茫滄海動新愁

生平口號

生平無計更依劉短髮蒙茸愧楚囚十載鶯花遲暮客  
三春煙雨別離愁浮生蝶夢莊周榻壯志鴟夷范蠡舟  
同學少年零落盡飄然江海一輕鷗

憶侯幾道雲俱兄弟王昶云侯演字幾道嘉定人

麗絕人弟滌字雲俱過目成誦皆諸生順治乙酉大兵徇地至嘉定七月城破輾當自沉於



家之葉池演潔從焉幼弟游  
年十一補諸生後亡命死

春城煙霧曉陰陰俯仰斜陽弔古今萬里河山猶故國  
九京風雨自同心欲知真主觀司隸未見孫兒屬羽林  
鶴唳華亭人沒後河橋一闕淚沾襟

四月七日寄研德武功叔姪去年此夕與二子  
步月新堤得屈平卜宅之句不意先文忠之  
識園亭猶是而死生漂泊心傷矣

園林入夏雨模糊寂寞青門恨草孤雲水相從新白社  
河山如隔舊黃墟亡秦猶有張公子哀郢誰憐屈大夫  
重到竹林等二阮風流還似去年無

簡顧偉南

楚客天涯久不歸平車東閣有光暉紫鱸鄉味思張翰  
黃耳家郵問陸機三省冠新墨勅百花煙水舊柴扉  
夢魂夜夜蘭亭月驚起扁舟滿衣

有嘲

重闌欲避曉風悲煙霧茫茫柳半垂歌舞微風青雀扇  
興亡斜照赤烏碑不容東舍王昌嫁却許西鄰宋玉窺  
正是江南行樂地清商一曲為誰吹

柬遺民沈師

姜如山兆翀云沈宏濟名楫當曰嗣  
王濬在夏忠節署中存古有師事之  
諡故云師宏濟入本朝以布衣終後七十生  
子見王勝時朱古飽詩所生子三歲殤卒無後



微風南浦暮煙通落日西山素影同歧路見憐青眼客  
知心惟有白頭翁交情牢落乾坤外舊業荒茫戰伐中  
萬里行蹤渾未定水雲何處不相逢

舟中憶邵景說寄張子退

姜兆熊云邵景悅卒於乙酉見玉僧十三君咏註以爲年只二十餘此詩言浮生哭故人亦謂其已死也又下有邵生黃土句尤明確清溪詩傳謂卒於順治八年誤

登臨澤國半荆榛戰伐年年鬼哭新一水晴波青翰舫  
孤燈暮雨白綸巾何時壯志酬明主幾日浮生哭故人  
萬里飛騰仍有路莫愁四海正風塵

東玄照家孟

天涯兄弟掩柴扉故國遺民共採薇江海何年傳錦字  
風塵吾黨半緇衣帝秦蹈海人猶在復楚依牆事已非  
日暮雁行愁欲斷鶴鴒原上白雲飛

贈徐似之侯智舍

煙波寂寞問樵漁五月柴門獨著書草澤何年平逐鹿  
江湖無地泣枯魚九章裘鄙人如在三戶亡秦氣不除  
先世交情千古事天門咫尺倍欷歔

偶念三秋舊集憶景說兼越行諸子

飄泊笙簧阻夢思蒼茫雲水更誰知遙憐白下千秋會  
頗學黃初七子詩滿目塵迷北闕傷心越鳥向南枝



邵生黃土風騷盡三復遺篇尚可師

春興

花落長干起暮濤傷心極望步蘭皋  
梁園雪後朱旗繞魯殿煙中赤羽高  
新雨江邊埋白骨故營淮口暗青袍  
請纓為問誰家事漫酌春泉聽伯勞

雕籠燕子逐芳菲煙景平康動翠微  
二月長堤香草靜三春古道客鴻稀  
龍沙雨濕桃花馬雞塞風輕柳葉衣  
堪歎旌旗明北地殘梅應傍戰場飛

冠帶追隨滿帝京黃金臺畔五雲明  
焚香謾謁含元殿賜錦誰開大宛城  
鼙鼓晨連弓劍氣龍綃夜隱珮環聲

漁陽烽火何時息百囀東風御柳鶯

春光搖曳古揚州宛轉東風十二樓  
洛浦鸞笙疑子晉嵩山鶴馭夢浮邱  
黃鸝數囀疎楊裏玄燕雙飛古陌頭  
芳草堪憐幽谷老玉關何事問封侯

江城

江城五月動哀一作笳一片塵到海涯沙幕一作未  
消前帳雪景陽先發後庭花征帆夜雨難歸國寶劍寒  
霜已破家遙望黃龍辭故主李陵碑上暮雲斜

贈舊闔李憶蘭

無定河邊起暮笳受降城外逐輕車  
射鵬雲度金微落



回雁風高玉帳斜老去吹寒秦箴策歸來彈徹漢琵琶  
當筵忽話遼陽事獵獵霜飛兩鬢華

夏日幽居

落日西山起暮煙芙蓉出水自田田百年蓬鬢風前換  
一片征帆雨後懸白鷺孤洲煙裊黃鸝千樹月娟娟  
幽扉習靜無人至讀盡南華內外篇  
愁絕關山獨枕戈亂離生計託煙波雲車無路道闐闐  
土室何心咏蓼莪走馬空城雲裡失啼鶯深樹雨中多  
不堪極目風塵際山鬼微寒弔女蘿  
一片孤帆入洞庭兩峯曉夾具區青江樓月滿人皆醉

浦口風來我獨醒束髮羞同孫討逆佩刀欲指衛丁零  
何年直搗 幕立馬燕然擬勒銘

得東報懷激廣

風流不減五陵豪夜夜樓頭太白高瑤草輕寒歸蕙苑  
石苔微雨動蘭膏風連海氣通宸輦日射江光入御袍  
犬馬懸心真不淺五雲如在聖躬勞

軍宴二首

十萬艤艦偃一作翠微風雷黃石問兵機月寒壁壘侵  
金柝風入旌旗動鐵衣自愧青藜陪客座幸從細柳識  
軍威轅門鼓角寒一作宵醉帳下南塘夜獵歸



星郎自愧早彈冠天策從來貴築壇娘子軍中春色醉  
將軍樹裡月光寒遲遲畫舫垂綃幕款款行廚洗玉盤  
我已破家酬大鎮相逢斜拂劍霜看

訪友不遇

錦衣玉靶自翩翩白羽瑯弓滿控弦萬壑風迴寒角靜  
千山日落大旗懸冠軍油幕羞生數好時雲臺最少年  
乘醉扁舟等鐵壘牙門深鎖白雲邊

魚服

投筆新從定遠侯登壇誓飲頭蓮花劍淬霜重  
柳塘衣響莫月秋勵志雞鳴思擊鐵驚心魚服愧同舟

一身湖海茫茫恨縞素秦庭天報仇

弔漱廣至西塘有述

谷水西塘兩地分雁行風雨恨離羣可憐玉樹埋青草  
曾向金庭訪白雲縞素六師黃石法死生一戰水犀軍  
知心惟有牙旗月夜夜依人恐是君

同友人過東道院

一片江聲入晚笳軍中高宴逐輕車幸陪紫塞將軍座  
來訪黃庭道士家玉洞花明秋不夜錦屏雲起暮爲霞  
此身竟逐征蓬去欲叩天門路已遐

鶉衣

鶉衣



鶉衣東去獨登臺歌舞軍中聽轉哀趙信城頭秋月滿  
李陵碑上暮雲開吳江落日圍山盡震澤微風入陣迴  
滄海一樵亡命後橋邊黃石待人來

題崑山水月殿

鷲嶺岩巖谷水陰崑山迢遞快登臨始知靈運尋山意  
猶是曇摩泛海心古寺松聲清磬遠寒潭雁影碧雲深  
青絲天棘風流在如見當年祇樹林

九日大風雨同智含夜飲

高秋夜雨不聞聲旅館孤燈酒自傾寂寞黃花千古恨  
婆娑寶劍一身輕風塵握手同兄弟江海知心託死生

遙憶故園芳草路滿離叢菊戰場明

道中作

山行三日萬山連今日纔開一面天石徑漸平看馬去  
雲林初霽見泉懸無人主碓春偏急有婦當壚客易前  
下筇不須錢滿百荔香新酒縮頭鱈

除夕追和廣成先生韻

案侯嗣曾豫瞻一字廣成性孝仕宦十餘年屢  
以母老乞歸為人清剛絕俗獨喜引掖後進以  
文章道義相切劘明季復遭令下賴其力得  
寢所著根極理要至性溢楮墨間名納言集

山河風景憶前年淚盡鮫人百斛泉鳳輦已空當日恨  
鹿門深愧古人賢江湖潮信潛歸越秦晉風雲半入燕



况對九京如可作國讎家難問蒼天

元旦 丙戌

不知景物又新年無限傷心對九泉虎豹遊魂長作客  
龍蛇守蟄更誰賢湘江寂寞空哀郢易水蕭條未報燕  
白首同歸交誼重國殤兩日南天

秋日避難膠東柬智含

昨夜秋風起洞庭三山落木曉風輕親朋交態渾如夢  
湖海生涯敢獨醒我已無家隨汗漫知君愁坐獨傳停  
故人頻洒河橋淚南國招魂感鵲鴿

寄研德

案侯泓字研德後更名涵字仲德嘉定人岐曾  
子岐曾字雍瞻農學少奇慧年十一與兄  
峒會岷曾同補諸生學使者表其廬曰江南三  
鳳及長博覽工文重氣節敦行誼吳門東雲  
間壇坳角立岐曾調劑其間與振興古學獎  
掖後進主文章名教速柄者三與順治兩七  
以匿故入陳子龍被逮備受慘刑者凡二  
次終不屈家信通得不死岐曾曰我無家何  
海無名待家信通得不死岐曾曰我無家何  
信為遂受刑門人私諡曰文節先生岐曾子  
洵泓與峒會字演潔靜羣從自順天副榜有  
六龍之譽坊字記原崇禎壬午順天副榜有  
不復應舉老居柅園因以自號洵早卒少  
諸生博習經史落紙如飛從弟滯亡命有司  
捕之泓挺身代繫久之事解寄蹤吳市一時名  
士推尤為淳耀所引重及卒鄉黨私諡貞憲先  
而泓有掌亭集錢塘陸麗京稱其述作勃然若  
雷霆沛然若決江河子開國



風塵大野日將曛滿眼悠悠獨識君潘岳已成懷舊賦  
陸機還作辨亡文羞將短 供 服愁對寒山起暮雲  
與汝相期遊白社孤鴻天外恨離羣

送馭閱蔣大南行

青浦陳子龍主社及明唐王僭號於閩平  
蔣大驚亟邀入社及明唐王僭號於閩平  
赴之授兵部司務晉御史抗疏劾鄭芝龍  
志士壯之福建破遂亡命服黃冠假青烏  
浮沉於世東至齊魯登泰岱謁曲阜轉魏  
間樂會稽山水遂家焉康熙十七年朝廷  
史局徵博學鴻詞故人欲為平階道地亟  
止之平階詩文詳贍典麗宗雲間派以京  
唐為要歸於書弘覽洞究無遺好談幾社  
事感慨跌宕淋漓不能休酒闌燭地涕淚  
聞者服其才而哀其志焉著書十餘種卷  
計破後皆散落無存遺命葬若耶之樵風

靈旗彷彿朔風寒俠客悲歌迴不歡芳草多情兵甲後  
白雲何處別離難滄浪漁父長哀郢湖海狂夫矢報韓  
此夜一樽傾盡醉夢中歧路恨漫漫

遇盜自解

浪迹烽煙獨此身天涯孤客淚沾襟綠林滿地知豪客  
寶劍窮途贈故人無復青氊王氏舊自憐犢鼻阮家貧  
逢人莫訴流離事何處桃源可避秦

十二月十八立春

可憐又是艷陽時孤客征衫泣路歧草木不欣秦正朔  
衣冠猶想漢威儀落梅入夜迎風急細柳知春遇雨遲



聞道海南多王氣扶桑先浴萬年枝

寄荆隱女兄

書劍天涯轉自親孤帆漂泊迴傷神自憐愁立寒塘路  
獨恨行吟澤畔身黃土十年悲故友青山八月痛孤臣  
當年結客同心者滿眼悠悠行路人

野哭

維下聲名並李膺龍門天半許誰登秋風零落三千客  
暮雨寒生十四陵毳帳近連青瑣闥明駝先踏玉河水  
魂飛故國知何處擊筑悲歌意不勝

感舊步仲芳先生韻六首

案嘉善縣志錢棻字仲芳中丞士晉子崇禎壬

午舉人流寇披猖閩部史可法招致幕下不就  
博通墳典鍵戶謝客著書于大滌山賦詩作畫  
遠近無不瞻仰年七十八著有燕  
宗邑乘讀易緒言莊子緒言諸書

故國鶯花滿地殘當年風景未應闌煙籠翠柳凌波靜  
雨過紅梨入夢寒芳草已經迷曲巷春光依舊滿勾欄  
江南一片傷心月多少琵琶馬上彈

五更風動角聲殘清酌沉沉歌舞闌蝴蝶夢中春月苦  
杜鵑花外曉風寒如雲錦袖歸塵土却月珠簾覆井欄  
酒醒忽思嵇叔夜廣陵一曲更誰彈

夜靜孤城玉漏殘登樓長嘯客愁闌三年寒食催征夢  
二月春花試曉寒故國風塵空擊楫舊園花鳥獨凭欄



五陵年少歸何處匣裡雙龍不敢彈  
 曙鶯啼過百花殘客子無衣泣夜闌錦瑟按來人不見  
 玉笙吹徹夢猶寒珮環曉醉芙蓉障羅綺春嬌芍藥欄  
 回首風流成往事幾行紅淚暗中彈  
 舊都風物暗凋殘東海孤臣淚未闌睥睨浮雲三殿曉  
 翠恩落月九天寒宮花寂寂啼黃鳥御柳深深隱畫欄  
 裘馬京華零落盡鐵冠高臥有誰彈  
 蘆荻臨風故壘殘漂零湖海又春闌子胥江上吹簫苦  
 如意堂前擊筑寒雲淨平沙連碧浦樓空斜月上朱欄  
 孟嘗賓客隨煙草更向誰門倚鐵彈

寒食雜

同錢二不識賦

王本有末章兼贈不識

不識嘉善人旃子讀書日數千言八九歲能詩  
 文弱冠有孺子集登崇禎癸未進士知嘉定縣  
 劉河之開籍役賦功民用不擾母病挂冠歸父  
 母相繼沒削髮入黃山卒於雲門顯聖寺著有  
 思存詩集初然逃方外時妻魏氏年二十六  
 默亡魏未之信又二十餘年招魂歸慟絕

朔風廣莫傲裘寒客子飄零行路難北首可憐秦郡縣  
 南來無復漢衣冠昭關去後難亡楚滄海歸時未報韓  
 袖裡吳鉤愁獨倚霜花夜夜月中看  
 親朋亂後幾人存湖海交情酒後論今古文章多薄命  
 江關詞賦半招魂王孫一飯誰知已漂母千金敢報恩  
 曾作信陵珠履客幾回慟哭大梁門



孤臣伏臘 天野哭茫茫幾歲年  
笛裏關山吹漢月 帳中霜雪滿  
煙風塵獨上要離墓 江海空浮范蠡船  
雲水滔滔歸不得 千金駿骨有誰憐

十年裘馬混風塵 猶是先朝侍從臣  
采菊每邀彭澤令 看衣不讓武陵人  
湘潭奇服憐哀郢 錦水玄亭恥劇秦  
故國銀魚新換酒 玉壺秋泛莫辭頻

按王本作寒食後二首

### 虎邱遇九高

竹馬交情十七年 飄流湖海竟誰憐  
知心獨弔要離墓 亡命難尋少伯船  
山鬼無回江上夢 楚囚一去草如煙  
姑蘇明月愁人醉 翦燭無言更惘然

### 由丹陽入京

萬里河山拱舊京 楚囚西去淚如傾  
斜風衰柳丹陽郭 細雨孤帆白下城  
殘夢忽驚三殿報 新愁翻覺一身輕  
從軍未遂平生志 遺恨千秋愧請纓

### 西華門與同難諸公待鞫

同舟今日半南冠 魂斷雲山舊築壇  
仁壽鏡移江月落 景陽鐘動曉風寒  
誰將杯底消秦獄 却向囊頭識漢官  
相對銀鐺趨右掖 夢中猶作侍臣看



藝海珠塵

南匯 吳 省蘭 泉之輯

金山 焦 晉 晝三校

夏內史集

夏完淳篋

卷七 七言絕

別子韶顧大妹倩案顧子韶名家駿少為考功館

刑惟顧與王勝時送之卒以康熙壬寅入學

鳳去秦樓信杳然返魂香盡斷腸年茫茫兩淚難為別

竹馬交情十五年

藝海珠塵

夏內史集卷七

一



漱廣有外舍雲英者亂後嫁人感傷不置代爲賦  
之

綺羅如土錦如塵重見雲英掌上身儂未成名歡已嫁  
揚州一夢爲誰人

送教坊樂官出塞

自憐天樂未曾聞送別黃沙始見君愁到年年青塚月  
夢歸夜夜白門雲

咏史雜成口號十首

亡楚奇功一旦收蘆中人去水悠悠昭關煙草茫茫外  
千古何人解報仇

黃金臺下兩茫茫雲夢悲風滿大荒憑弔興亡千古事

風流燕楚二昭王

英雄草澤氣成雲烈士遺風恥二君堪笑士衡歸洛後  
何顏更作辨亡文

遺恨殷郊太白虜黃虞千載更無依當時尙有頑民在  
何事西山獨採薇

羽扇綸巾油壁軒隆中三策爲誰喧英雄寂寞歸黃土  
千載西風五丈原

江左衣冠六代愁門庭花草色千秋可憐卞氏推三烈  
當是烏衣第一流



草澤遊魂性不馴英雄短氣未  
秦素書三卷尋常事  
誰是當年授履人

如花歌舞入長門賜斷君王雨露恩自請和戎青海月  
琵琶一曲向誰論

束髮從王志未賒寶刀風雨拂霜花黃雲白水真人氣  
年少功名鄧仲華

蓼莪三廢有遺音嵇紹彈冠血滿襟叔夜家風豈掃地  
廣陵絕曲倍傷心

### 送客金陵四首

山光無限水悠悠古苑花明月滿樓送君馬上休回首

玉笛三聲一葉秋

王本作舟

此去離亭半夕陽烏啼舊闕夜荒茫

王本作滄滔滔江水無

情極明月秦淮水一方

夜月啼雅白下坡回看雙闕淚沾纓紫苔最是无情物

偏向金鋪雨後生

紫駟遊獵孝園歸猶是罷熊鎖翠微一片鍾山陵上月

天風吹上舊臣衣

### 樓雨暮懷

落月空山哭子規輕煙漠漠柳低垂登樓無限傷心事  
暮雨盈盈欲待誰



曾攜寶劍叩夷門朱邸蕭條席尚溫今日三千珠履客  
誰人知報信陵恩

樓頭口號得門字二首

樓頭花草正黃昏猶有殘霞過雨痕無限倚闌愁客淚  
隔牆斜月聽雍門

江南日暮慘離魂四海交情酒後論露下天高腸欲斷  
秋來客散盃嘗悶

錢漱廣為余內兄丰姿玉立神采駿揚綱紀翼備  
百行具備天假以年且有為以死哲人云亡那

國殄瘁哀哉得絕句十八首短歌之悲過於長  
號非有情者不足以語此

嵇阮當年二酒徒河山邈隔恨黃墟自從兩哭錢侯後  
天地傷心一劍孤

王本有候為家姊倩文中七字小注

九年地下文中子人世風流祇屬君今日傷心惟我在  
夜臺何日共論文  
驚聞哀訃淚潸潸白玉樓成跨紫鸞二十七年回首處  
闔風煙霧逼人寒  
三春湖海興如煙十載交情竟惘然重到西江秋似水  
芙蓉墜粉更誰憐



回首長歌更短吟三春唱和更沾襟看君壁上龍鳴劍  
依舊霜花夜夜深  
遙憶音容淚滿巾到今天地轉風塵雞鳴寒夜愁難曉  
不見當時起舞人  
當年結客少年場夜夜吳姬錦瑟旁腸斷幾回聞誤曲  
不知何地覓周郎  
可憐沒後久銷形猶是生前未盡情夢裏對愁知已沒  
醒來回想忽如生  
曲江紅樹有微霜七尺桐棺弔北邙杯酒臨風惟慟哭  
黃花白草月茫茫

銀缸靜夜憶殷勤汝已吹簫弄白雲十二玉闌愁倚遍  
月來移影忽疑君

秋水娟娟影若虛風流衛玠更何如可憐玉樹歸黃土  
敢學當年謝幼輿

倚樓人影落江潭却憶西園酒半酣公子風流今不見  
秋來衰柳獨參參

江風暮雨入南樓玉笛秋翻旅客愁昨夜夢君驚坐起  
一聲孤雁水悠悠

九曲秋江靜不波美人長往恨如何當年意氣歸煙霧  
地下文章泣綺羅



一夜西風闐闐開招魂秋草不勝哀九原道誼何人在  
千古文章未盡才

杭上相逢還說夢樽前如見不聞聲傷心驚起無人問  
獨倚寒窗月自明

玉山頽謝碧雲空落葉無情下曉風思曼風神銷歇盡  
僅留一哭待張融

落月殘霞剩錦衣淒涼玉軫斷金徽與君齊跨瑤池輶  
同到人間獨自歸

絕句口號八首

竇身荆棘滿目風塵哀厲之詞殊乖風始聊以

紀一時流離之苦耳作者勿以風雅觀勞人草  
草於斯見之矣

去年人送短長亭一片煙波入洞庭江海無情人不見  
芳洲春草為誰青

毅魄歸來風雨多瀟湘春盡晚生波可憐屈宋師門誼  
空有招魂弔汨羅

朱門華屋已成塵黃土荒邱未卜鄰天下文章俱寂寞  
平陵一調屬何人

昨夜驚魂渡五湖愁中飛夢到姑蘇丹陽道上南冠客  
重到新亭洒淚無



江上花飛隱釣船羊裘百結竟誰憐一人亡輪無張儉  
三戶虛聲有項燕

春 滿院百花明和淚成書問遠行欲寄東風無羽翼

愁隨明月渡江城黃土荒泥未少憾天下文章

愁來江上柳條青漁父狂歌忌獨醒高臥夢回青嶺

相思人在白樓亭

無衣客子半天涯何處相逢拂劍花三月故鄉消息斷

更呼鸚鵡報誰家

家園早梅盛開時寄跡武康塘一作賦以一作懷之

逢花却憶故園梅雪掩寒山徑不開明月愁心兩相似

一枝素影待人來

宴送盛伯弇之金陵盛工丹青

十載傷心老畫師孤帆歸去淚如絲舊京無限靈和柳

折盡東風第一枝

方穀城遺孤流落郡中詩以教之

平津賈客竟誰留黃土恩深尚未酬縱有羊曇知舊澤

還憑醉後哭西州

絕句

垂楊莫莫雨珍珍獨倚雕闌撫劍鐙欲待美人愁日暮

斷腸風信自東南



扁舟明月兩峯間  
千頃蘆花人未還  
標影蒼茫不可接  
白雲空翠洞庭山

相國風流盡可師  
講壇景色似當時  
漳江一帶新栽柳  
不遣東風向北枝

大滌山頭起暮煙  
武夷人去草芊芊  
自從一閉平津閣  
珠履三千盡駭然

黃講學大滌山

東風吹一林  
下地心未盡  
其意深  
妹素潔  
人來

藝海珠塵

南匯 吳 省蘭 泉之輯  
奉賢 吳 祖泰 裕傳校

夏內史集

夏完淳篋

卷八 詞

滿江紅 惆悵

淥水三年小橋畔  
相逢曾賦長凝竚  
青驄有影章臺無  
路月下凭肩衣尚煖  
樓邊覓約書成蠹  
訪城西惟有畫  
檐蛛絲如故  
曉雲意人空暮  
題詩客愁應訴  
奈綠陰



滿徑乍逢崔護芍藥已傳春夢遠楊花又被東風誤想  
雕闌不墜卻沾泥言還隴

賦得微字

瀟湘夜雨

鶯轉花更蝶圍香國重闌朝暮愁歸墜鞭人瘦怎禁小  
風吹不爲春醒嬾起分香處燕子來窺芙蓉帳餘煙已  
渺紅淚染離鞋相逢何處也難尋丹棘欲寄啼規恐  
蕭郎別後淺淡愁眉剩有菱花一半已不是那日崔徽  
長堤路桃花帶笑柳眼已含悲

魚遊春水

春暮

離愁心上住捲盡重簾推不去簾前青草又送一番愁

何處樓人遠簫如夢鴛枕詩成機不語兩地相思半林  
煙樹猶憶那回去路暗浴雙鷗催晚渡天涯幾度書  
回又逢春暮流鶯已爲啼鶻妬蝴蝶更禁絲雨誤十二  
時中情懷無數

婆羅門引

春盡夜

晚鴉飛去一枝花影送黃昏春歸不阻重門辭卻江南  
三月何處夢堪溫更堦前新綠空鎖芳塵隨風搖曳  
雲不須蘭棹朱輪只有梧桐枝上畱得三分多情皓魄  
恐明宵還照舊釵痕登樓望柳外銷魂

一翦梅

春日



昨夜花開第幾枝  
還是東風燕子來  
時南雲畢竟幾時  
還獨倚闌干紅雨  
絲絲采綠人歸有  
所思何事分飛  
夢到還遲含情無  
緒咏春愁調得新  
聲恐被鶯知

鵲踏枝

春閨

珠簾小婦盈盈坐  
不到春深不解相  
思苦獨倚玉闌斜  
欲語梨花幾陣黃  
昏雨聽宛轉聲聲  
杜宇回首銷魂  
無計教春去憶得  
舊年郎去路連天  
芳草斜陽渡

西江月

寫懷

紫燕來時春徧黃  
鸝啼處煙多過期  
不至奈愁何細雨  
斜風古渡離恨夜  
來寂寞歸期春去  
蹉跎盈盈江口

望煙波枉是朝朝暮暮

一翦梅

詠柳

無限傷心夕照中  
故國淒涼剩粉餘  
紅金溝御水日西  
東昨歲陳宮今歲  
隋宮往事思量一  
晌空飛絮無情  
依舊煙籠長條短  
葉翠濛濛纔過西  
風又過東風

兩同心

有夢

夢到揚州依然南  
浦綺羅如夢錦如  
塵香車寶馬知何  
處煙籠十里隋堤  
茫茫飛絮舉目魂  
銷腸斷春光如  
許瓊花消息竟飄  
零荒臺古苑春無  
主想鶯花十二樓  
前迷離煙雨

驚梅珠塵

夏內史集卷八

三



千秋歲

憶舊

幾番薄倖無限傷心景  
眉前事心頭病殘燈餘一點恰  
把羅衣整窗櫺外一枝帶雨梨花影  
獨步東風靜訪  
當時花徑寒悄悄花光淨人去多時也  
往事猶堪省飄  
紅淚銀缸露滿鞦韆冷

西江月

春日

煙柳斜風曉夢輕  
花過雨春陰無聊無賴到而今  
又是一番花信  
枝上流鶯裊裊天涯芳草深深踏青何處  
散春心拾得半天愁悶

醉花陰

寓怨

年年風色真難買  
聞道春如海幾度悞佳期  
獨倚闌干  
錯把相思害  
柳絲枝上風塵債  
亂點幽蘭外  
翻解誤  
紅顏自捲珠簾  
日日盈盈待

望江南

江上望郎在木蘭舟  
遠水孤帆天漠漠  
斜風急雨水悠悠  
悠歸去不勝愁  
期已過不見暮帆收  
寂寞孤燈寒枕  
簾徘徊殘月掛簾鈎  
腸斷五更頭

燭影搖紅

辜負天工九重自有春如海  
佳期一夢斷人腸  
靜倚銀  
缸待隔浦紅蘭堪採  
上扁舟傷心欵乃梨花帶雨柳絮



迎風一番愁債 回首當年綺樓畫閣生光彩朝彈瑤  
瑟夜銀箏歌舞人瀟灑一自市朝更改暗銷魂繁華難  
再金釵十二珠履三千淒涼千載

滿庭芳

永巷驚風長門送月年年幾度傷心銀釭點點淚滴露  
華侵此夜西宮絃管魂夢中彷彿車音驚坐起孤鏡殘  
月愁坐倚瑤琴 沈沈芳信杳金鳧煙冷銀鴨香深聽  
風絲雨片落月鳴禽卻望君王何處昭陽歌舞動花陰  
遙思想六龍天上刀尺動秋砧

柳梢青

江泊懷漱廣

玉人天際最堪憐月色上花枝暝宿吳江風鏡零亂一  
晌相思 天涯何日歸期想攜手清光舊時立盡黃昏  
亂鴉啼處此恨誰知

喜遷鶯

暮雨南懷

登樓望露華新滿日盡風塵鶯花無主不勝春偏逐斷  
腸人 郎未來儂未去獨倚雕欄無語淚珠滴滴對銀  
釭化作今宵雨

秋波媚

夜泛

急棹孤舟弄晚晴漠漠柳煙輕相思半枕天涯夢繞依  
舊愁城 思量往事難回首重到不勝情新愁滿地荷



香十里明月三更

一斛珠 新月

暮蟬啼後欄干獨倚芙蓉扣  
丁丁滴滴添銅漏萬里雲  
輕一點清光逗 天涯人遠愁時候  
乍晴乍雨催人瘦  
新愁不許春山鬪酒醒  
荷香昨夜相思透

鵲橋仙 樓夜

菱花嬾對沈香慵  
燕幽恨茫茫千結待將一枕化愁腸  
卻又夢人間離別  
幾番煩惱一天愁悶  
半雨半晴時節  
猛然聽得杜鵑啼  
又早是一輪殘月

卜算子 斷腸

秋色到空闌  
夜掃疎桐葉  
誰料同心結  
不成翻就相思  
結  
十二玉欄干  
風有鐙明滅  
立盡黃昏淚  
幾行一片  
鴉月  
阮亭云寓意即工自是再來人

喜遷鶯 秋恨

黃昏月五更風  
一點落花紅  
和煙和草月朦朧  
淚雨滴梧桐  
露華深羅被冷  
疑是郎來驚醒  
凌波幾步下迴廊  
月破風簾影

憶王孫

珠簾斜捲翠鬟垂  
曉月重樓人未歸  
細按紅牙嬾畫眉  
影徘徊  
一種東風幾樣吹



浣溪沙

柳色深深聽曉鶯  
玉闌愁倚夢分明  
閒花斜落小釵橫  
蝴蝶前生原夜合  
楊花身後化浮萍  
東風輕薄誤多情

憶秦娥

傷離別相思又值清明節  
清明節  
薊門衰草漢宮紅葉  
愁懷萬種憑誰說  
邊鴻不到音書絕  
音書絕  
長安何處晚山重疊

醉花陰

片雨弄愁愁未了  
柳眼窺春早  
深處未鶯來  
弱影絲絲

翠入晴江小  
鶯黃半卻煙光曉  
翦出東風巧  
借問馬頭人  
長短亭前畱得青多少

尋芳草

幾陣杜鵑啼  
卻在那杏花深處  
小禽兒喚得人歸去  
喚不得愁歸去  
離別又春深  
最恨也多情飛絮  
恨柳絲繫得人愁住  
繫不得愁人住

天仙子

紫玉轆轤青錦索  
金井梧桐寒寂寞  
霜驪馬上冶遊郎  
花下約  
鏡前話  
人在畫樓寒翠幙  
無奈愁人春夢惡  
淚點羅衫春袖薄  
一江煙草亂相思  
當初錯而今莫雁



藝海珠塵

又不來花又落

藝海珠塵

南匯 吳 省蘭 泉之輯

奉賢 金 祖錫 价藩校

夏內史集

夏完淳纂

卷玖 檄 論 書 問

討叛降大逆臣檄

崇禎十有七年夏七月江左諸少年討降叛大逆臣曰  
運啟十華便有元黃之戰德深九世亦來赤綠之羣土  
穴廩君餘魂散野山頭廷尉逆首行邊初飛樹鶴之毛

夏內史集

夏內史集卷玖

一



笑漫天於阿舅纔問野豬之口談綴日於黃家兩臂揮  
汗血之鞭月中躍馬一眼見如人之石河上投戈代有  
元兇終焉分冢若我太祖駕綠蟠而首出克靖南街文  
皇行元菟以重華永清北極宣英憲孝撐梨不晦之辰  
世穆神熹若木嘗輝之旦大行皇帝代來而東南再讓  
兆洽庚庚周鼎而西北多艱治先甲甲三百年之鐘虞  
德邁五三十六世之和鸞運逢百六濺衣嚴衛嗟庶見  
於槐林齧臂殉亡止相期夫椒闔雲昏雀瓦燃灰玉女  
之窗日暗龍樓花碧仙人之掌方介圭時惕不聞子弟  
梨園奈金柅頓弛誰作父兄僕射祇以付陵有部相持

鈞黨之名遂爾司馬無師莫講飲飛之技因之青袍入  
殿外朝不抱烏號黑犢驚鑿後苑惟啼苦竹引豺狼於  
中禁疇作厲階甘臣妾於敵營爭誇新寵慕容豔耦薦  
枕堅頭匍勒半人授冠鑿齒碧池舞馬并無摩詰賦詩  
金統懸雞先待日休草詔父師渠帥呼牛則夫子關西  
堯禹叛囚報李則將軍宇宙遂不憚淮淝送死急請投  
鞭復倡言許雒營田無煩運粟引弓不阻筮同鄭國之  
蛇伏劍無徒心異臨江之燕百爾朝貴交誦范陽聖人  
藐茲庶民或效宣陵孝子彼義深屬吏田疇尙哭幽州  
豈恩薄舊君豫讓乃忠智氏泥梨未滿其獄狗彘詎食



其餘倘爲子禁潛歸定台燃臍掛膽若更會之懷毒尤  
須赤族瀕宮我儕帛書自矢室劍相盟君子六千有死  
無生之氣丈人九二承家開國之心二姓老奴罪在不  
赦一門先澤義無可辭子明髭髮之年便能擊賊討逆  
成童之歲卽善揚兵誓不與此賊俱生河朔將持虎節  
請問汝元宮何在里門早樹蠡旗謹檄

土室餘論

淳之生也十有七年昊天不弔宇宙禍盈生之不辰非  
我先後先文忠投淵殉節便爾無家湖海飄零於今三  
載風旂霜旆挺衿短衣備人世之艱辛極君親之冤酷

窮途歧路斷梗飛蓬日旣如流天猶共戴嗚呼淳固知  
生不如死久矣特以國難家仇未能圖報忠臣孝子自  
當笑人故飲恨吞聲苟全性命湖中之起身在行閒不  
忘喪元獨當一面江東嶺表日月雙懸先文忠爲國死  
淳也爲國生于是七尺受一命之榮九重蒙三錫之典  
恨不滅此朝食下報幽冥噫以淳拜命蠟丸執戈幕府  
成仁一死抑亦何言嗚呼家仇未報臣功未成齋志重  
泉流恨千古今生已矣來世爲期萬歲千秋不銷毅魄  
九天八表永厲英魂先文忠得爲皇明臣淳也得爲先  
文忠子吞聲歸冥含笑入地嗚呼淳今死矣抑又何言



獄中上母書

不孝完淳今日死矣以身殉父不得以身報母矣痛自  
嚴君見背兩易春秋冤酷日深艱辛歷盡本圖復見天  
日報大仇卹死榮生告成黃土奈天不佑我鍾虐明朝  
一旅纔興便成齏粉去年之舉淳已自分必死誰知不  
死死於今日也斤斤延此二年之命菽水之養無一日  
焉致慈君託迹於空門生母寄生於別姓一門漂泊生  
不得相依死不得相問淳今日又溘然先從九京不孝  
之罪上通於天嗚呼雙慈在堂下有妹女門祚衰薄終  
鮮兄弟淳一死不足惜哀哀八口何以爲生雖然已矣

淳之身父之所遺淳之身君之所用爲父爲君死亦何  
負於雙慈但慈君推乾就濕教禮教詩十五年如一日  
嫡母慈惠千古所難大恩未酬令人痛絕慈君託之義  
融女兒生母託之昭南女弟淳死之後新婦遺腹得雄  
便以爲家門之幸如其不然萬勿置後會稽大望至今  
而零極矣節義文章如我父子者幾人哉立一不肖後  
如西銘先生爲人所詬笑何如不立之爲愈耶嗚呼大  
造茫茫總歸無後有一日中興再造則廟食千秋豈止  
麥飯豚蹄不爲餒鬼而已哉若有妄言立後者淳且與  
先文忠在冥冥誅殛頑嚚決不敢捨兵戈天地淳死後



亂且未有定期雙慈善保玉體無以淳爲念二十年後  
淳且與先文忠爲塞之舉矣勿悲勿悲相託之言慎  
勿相負武功兄將來大器家事盡以委之寒食孟蘭  
杯清酒一盞寒燈不至作若敖之鬼則吾願畢矣新婦  
結褵二年賢孝素著武功舅好爲我善待之亦武功渭  
陽情也語無倫次將死言善痛哉痛哉人生孰無死貴  
得死所耳父得爲忠臣子得爲孝子含笑歸太虛了我  
分內事大道本無生視身若敝屣但爲氣所激緣悟天  
人理惡夢十七年報仇在來世神遊天地間可以無愧  
矣

遭夫人書

三月結褵便遭大變而累淑女相依外家未嘗以家門  
盛衰微見顏色雖德曜齊眉未可相喻賢淑和孝千古  
所難不幸至今吾又不得不死吾死之後夫人又不得  
不生上有雙慈下有一女則上養下育託之誰乎然相  
勤以生復何聊賴燕田廢地已委之蔓草寒煙同氣連  
枝原等於隔膚行路青年喪偶纔及二九之期滄海橫  
流又丁百六之會熒熒一人生理盡矣嗚呼言至此肝  
腸寸寸斷執筆心酸對紙淚滴欲書則一字俱無欲言  
則萬般難吐吾死矣吾死矣方寸已亂平生爲他人指



畫了了今日爲夫人一思究竟便如亂絲積麻身後之事一聽裁斷我不能道一語也停筆欲絕去年江東儲嗣誕生各官封典俱有我不曾得夫人夫人汝亦明朝命婦也吾累汝吾誤汝復何言哉嗚呼見此紙如見吾也外書秦篆細君

燕問

有客問於夏子曰蓋聞九土星羅不以邊陲爲襟帶八紘繡時不以荒裔爲寰區燕之立國逼處夷落號爲四戰帝宇晚立遂制中原子其述河冀之雄躔暢幽燕之洪緒以黼黻神京憲章河維夏子曰夫燕都者舍跨太

行枕倚居庸左倚秦齊右屬岐雍名疆迭郭晉絳重封  
卻背重阻外合中通連汾潞漳土厚成膏水陸輻輳雨  
散雲以下闕

夏內史集附錄

補城方子雷州府知府夏內史集附錄  
子論甲乙以後述節及松江諸公余言夏瑛公師死  
先其子完淳字存古以十七死其人其文古未有也  
子請其詳余曰存古五歲知五經九歲善講解古文十  
六十七與友人有事會中會江東有詔諭瑛公師文忠  
蔭一子中書存古乃上表及疏稱中書臣完淳以進報



畫了了今日為夫人一思究竟便如亂絲積麻身後之事一聽裁斷我不能道一語也傳筆欲絕去年江東備嗣誕生各官封典俱有我不曾得夫人夫人汝亦明朝命婦也吾累汝吾誤汝復何言哉嗚呼見此紙如見吾也外書秦篆細君

燕問

有客問於夏子曰秦之為國也... 燕問... 秦之為國也... 燕問... 秦之為國也...

藝海珠塵

南雁 吳 省蘭 泉之輯

奉賢 金 萃階 聚之校

夏內史集附錄

桐城方子畱授南冠草序壬辰冬偶遊四明與朱陸諸子論甲乙以後忠節及松江諸公余言夏瑗公師死最先其子完淳字存古以十七死其人其文古未有也諸子請其詳余曰存古五歲知五經九歲善詞賦古文十六十七與友人有事會中會江東有詔諡瑗公師文忠蔭一子中書存古乃上表及疏稱中書臣完淳以進報



某虛實約兵以某日航海會某所爲邏卒所獲就鞫金陵某某欲活之曰汝年少豈知兵存古曰吾年少豈遂不知兵某曰汝口何不惜汝身曰倘死而復生他日

必先文忠與我也身何足惜因顧謂其婦翁曰男兒死身何能作求生狀遂就義於金陵之西市諸子曰有是哉恨未見其人也其疏及表在乎余曰微獨疏表在向余過武林蔣氏兄弟見存古有大哀賦有獄中上太恭人書寄錢孺人書有示同事諸友書有自訂詩近千首此存古之文也已又得其南冠草因出示諸子諸子請歌之余爲之歌別雲閒諸子曰壯哉往而不返者也

何鶴唳之足悲乎爲之歌辭恭人曰哀而不怨太恭人有子復何恨爲之歌寄內曰嚴而婉責其婦以程嬰乎余輟歌曰存古死而遺腹得一子一女天之報施不爽哉爲之歌寄姊及甥曰甚矣哉大仇其可忘乎爲之歌寄半村及聞大鴻計曰其皆死心乎是知生而知死者也爲之歌細林曰知大夏者其孟公乎非孟公而細林之哭誰能若是爲之歌遇子高及轅文曰是真可以告友朋乎又何知友之明也爲之歌入京及被鞫諸什曰至矣哉烈而醇苦而甘怨而溫直而不屈勇而不懼靜而不亂思而不貳求仁而仁取義而義惟故國之傷也



以忘其身與家如存古者忠孝兼之矣而以十七傳古  
今未嘗有也南冠草者可以名存古之人可以名存古  
之文矣因手訂之而命予爲敘

明州陸明懷字燦南冠草序嗚呼此夏子絕筆也余讀  
而歎曰忠孝也經濟也文章也至夏子而觀止矣乃其  
年更不可及也國初沐黔寧鄧衛公俱以十六七垂功  
名而文采或不彰解吉水年十八上庖西封事萬言乃  
不死爲周紀善作傳有遺議焉王義烏使諭滇南置脫  
脫以死至今生氣然年五十餘矣若夏子不更奇哉嗚  
呼本朝非無事也使夏子不生於今日何必不與金華

當塗以文章開草昧不然何必不與北地瑯琊以翰墨  
濶太平卽欲以盤錯顯則何必不於己巳己卯之閒附  
忠肅文成以自見卽不幸而以死殉乎則何不於靖難  
之後與方練諸公同碎首而乃生於斯世也不亦痛乎  
予用是悲其遇慕其人而不得見將見其詩若文全集  
又未遑得則先梓此南冠草是亦丹穴之片羽也然亦  
可從斯以見夏子矣

蛟州范香谷兆芝南冠草序國家之故非一要必有忠  
孝卓犖之士生之也功不必其成也故博浪之椎奮而  
祖龍之氣奪卽身亦不必其生也歌平陵東者不絕於



耳而後南陽之氣振是世之升降如粉本而人之生死成敗於其際者如青黃焉丹雘焉非然則史冊亦幾乎寂寞矣昭代自甲申後有志者欲自振拔其人益張事益奇爲史策生色益絢夏子存古其一也或曰惜也人固不可無年以夏子之才而用諸老成功名必有可觀或曰悲哉夏子生不辰漢文有言子當高帝時萬戶侯何足道或曰惟瑗公先生之文爲談爲彪惟夏子之文爲遷爲固藉玉步不改著書石渠天祿間詎非一代光悲哉夏子辰安在或曰夏子過矣何不隱忍以待功臨耿鄧而一蹶不收盛事不再若然是悲夏子之身死而

功不就也是欲忠孝卓犖之士必生於功名之會也乃夏子死而甲申以後藉以不寂寞則死有時賢於生而功何必不在天下哉今其詩具在使後死者知甲申之後猶有人則天下方在夏子之青黃丹雘中又何事爲惋惜也

四明董佩公劍鏢南冠草序陳夏文章齊名海內幾三十年矣昔常一謁陳先生先生神宇嶽嶽望之心死用是益神往於夏先生甲乙以來兩先生相繼死節益爲華夷萬禩重齊名又不僅以文章矣及讀南冠草斂容起曰兩先生亦厚幸哉始同郡同學同負物望又同中



春官同盡節死兩先生亦厚幸哉不謂夏先生之後復有存古中翰也雖然父子朋友之間氣自相貫有陳先生有子得如存古否余又因存古而益神往於陳先生之令嗣矣我友范子香谷陳先生門下士也試爲我問之

鍾廣漢淵映云陳大樽選明詩存古年纔十餘耳而宋轅文援其論詩以作序此時已許其作後進領袖矣迨十五從軍十七授命磨盾草檄不異老生宿儒洵異稟也

計子山南陽弔存古詩云一時義旅日紛紛石友同歸

有數君海上龍旂終不見山中鶴唳竟無聞銀烏永夜啼明月黃鵠三秋怨白雲渺渺故園離散後可憐風雨浸孤墳濁醪長夜自從容一曲瑤琴恨未終雒下書生空作賦漢廷才子爲誰雄魂依杜宇三更月氣作雲霄百尺虹此去巫陽招未得大江千里暗丹楓沈確士德潛云存古生爲才人死爲鬼雄汪騎不足多也詩亦高古罕匹

闕名成仁錄云夏完淳者字存古華亭人吏部郎中允彝之子也年十六從師陳子龍起兵太湖遵父遺命盡以家產餉軍曾監國遙授編修子龍戰敗完淳走吳



易軍爲參謀被執至雷都經畧洪承疇欲寬釋之謬曰童子何知豈能稱兵叛逆誤墮賊中耳歸順當不失官完淳厲聲曰我嘗聞亨九先生本朝人傑松山杏山之戰血濺章渠先皇帝震悼褒卹感動華夷吾常慕其忠烈年雖少殺身報國豈可以讓之左右曰上座者卽洪經畧完淳叱之曰亨九先生死王事已久天下莫不聞之曾經御祭七壇天子親臨淚滿龍顏羣臣嗚咽汝何等逆徒敢僞託其名以污忠魄因躍起奮罵不已承疇色沮無以應時完淳婦翁職方司主事錢旃同在訊氣稍不振完淳厲聲曰當日者公與督師陳公子龍及完

淳三人同時歃血上啓國主爲江南義舉之倡江南人莫不踴躍今與公慷慨同死以見陳公子于地下豈不亦奇偉大丈夫哉旃遂不屈與完淳同死完淳時年十六先是國再變爲大哀賦萬餘言淋漓愴痛世爭傳誦別著有南冠草一卷

王鴻緒明史彙夏允彝字彝仲松江華亭人弱冠舉於鄉好古博學工屬文是時東林方講學蘇州高才生張溥楊廷樞等慕之結文會名曰復社允彝與同邑陳子龍何剛徐孚遠王光承輩亦結幾社相應和名重海內崇禎十年與子龍同舉進士授長樂知縣善決疑獄他



郡邑不能決者上官多下長樂居五年邑大治吏部尙書鄭三俊舉天下廉能知縣七人以允彝爲首帝召見大臣方岳貢等力稱其賢將特擢會丁母憂未及用北都變聞慟哭累日毀家倡義走謁尙書史可法與謀興復聞福王已立乃還其年五月擢吏部考功司主事疏請終制不赴及馬士英阮大鍼亂政重允彝名屢爲好詞招之拒不應服旣除猶不赴御史徐復陽者故逆案中人至是復官希要人旨劾允彝及其同官文翼德居喪授職爲非制以兩人皆東林也兩人實未嘗赴官無可罪吏部尙書張捷遽議貶秩調用時論爲之不平未

幾南都失傍得山澤閒欲有所爲聞友人徐石麒侯明曾黃淳耀徐汧等皆死乃以八月中賦絕命詞自投深淵以死允彝學務經世歷朝制度暨昭代典章無所不諳習獨處一室志常在天下名旣高四方人士爭走其門書問往來酬答無暇暑獎勵後進有片言善稱之不容口多因以成材與子龍齊名晚節亦畧相似人謂自首同所歸云子完淳字存古生有異稟七歲能詩文年十三擬庾信作大哀賦按大哀賦作於乙酉以後殉難在十六歲如成仁錄云十六殉難亦是十四五作賦不當云十三也文采宏逸允彝死後二歲以子龍獄詞連及亦逮下吏談笑自如作樂府數



十闕臨刑神色不變年甫十八允彝兄之旭字元初以諸生貢於廷有聲南都失欲死允彝託以妻子乃不果自此不入城市亦以子龍故作絕命詞從容謁文廟自縊復聖位旁  
吳履震五茸志逸隨筆明處士夏之旭絕命辭我於甲申春遭先帝之變已無意人閒世矣奈以家累牽纏妻沈氏死於乙酉三月於五月幼子復死遂削髮於竹籬菴不幸八月松城破予弟仲彝殉節余時欲與弟同死因孤寡幼弱弟堅囑予畱看孤寡遂覘顏視息焚修奉佛不入城市不見親友此松郡萬耳萬目不可掩也今

年四月間忽傳吳鎮有復明之舉余曰徒使生靈塗炭耳遂避跡松塘荒僻之地一日方督耕田所忽有憲牌坐予爲陳子龍叛黨捕役先擒予次子詣私室酷刑逼詐予時聞知不覺髮指背裂欲挺身就戮獨念叛無實據入以不赦之條皇天后土實鑒臨之但今之所謂叛乃明朝之所謂忠也彼加我以叛名乃加我以義名耳何妨一笑受之有勸予者曰土撫臺公平詳慎何不出辨而遽自裁余曰我生平豪傑自命今以方外自處何等高潔乃囚首屈膝求活於公府之庭不亦羞當世而負生平耶然不死於家而死於聖殿幼讀聖賢書而死



聖賢地之旭死於聖賢之教非死於清朝也為清朝之  
官者苟良心不死天理猶存於枉死者亦一動念乎抑  
予更有說焉人壽幾何富貴幻泡幸當事者少存慈祥  
寬釋冤累以求免於劫運循環未必無少裨也慈憫衆  
生饒舌勸化又自笑其婆心矣

華亭馮鼎位素生休菴偶筆丁亥四月十七夜提督吳

兆勝於府後朱房即今之大開宴遍邀府廳縣及諸營

將畢集惟傅太守病不赴酒半輟席起忽出一冊置几

上陳筆墨硯各令簽押共盟舉兵海防楊之易理刑方

重朗不從立手刃之華令潘必鏡長跪哀請得免四鼓

令各兵易衣帽上城東盼海舟無一至西候湖寇亦寂

然詹大廳素狡猾知事不諧卽手擒吳帥星飛赴軍門

告變撫臺土國寶上疏發已大人率滿兵會同土撫陳

操江錦至松駐劄跨塘橋西遍拏湖寇審知卽斬如陳

如殷如夏如葛波連數十家解京正法滿漢官皆慕陳

黃門名惜其才語之曰公若降當特疏以原官起用不

次高擢陳不跪不揖南向席地坐但以速死為幸衆欲

殺之士猶不忍屬將領請至舟次以甘言誘之至晚乘

閒自投河死仍戮其屍梟首懸示西門殷則至死倔強

楊陸榮三藩紀事本末順治四年丁亥四月松江提督  
吳兆勝據城以叛先是三年丙戌六月李成棟調往福



建兆勝移鎮松江有周謙者故從白黨來降者也稍知  
文墨兆勝曬焉因通海寇黃斌卿令舉兵內向給事于  
陳子龍舉人殷之輅生員張寬等皆與其謀斌卿約于  
四月十六日兵至而海舟非風不行連日北風大作舟  
不時至海防同知楊之易推官方重朗知其謀潛移書  
洪承疇言兆勝反狀承疇以令箭促之易重朗至殺之  
勝大懼十五日夜將半以箭促之易重朗至殺之  
明日黃兵必至也天既曙城門寂然副將詹天祥知事  
不濟卽同都司高承義率兵入執兆勝按誅將校十七  
人二十四日大兵至松江執方龍于廣富林子龍乘閒  
赴水死出其屍戮之子陳時方五歲  
亦論殺殷之輅逮至南京斬於市

蘇州府志劉曙以舟山事械送金陵下獄八旬與崑山

顧咸正松江夏完淳及同邑管定縱橫詩酒談說忠義

為樂丁亥九月十九日赴市連呼高皇帝而死

嘉興府志曹度字正則邑廩生少負雋才博通經史旁

及天文歷數諸書靡不究覽工書法善詩文夏考功允  
彝賞識之命其子完淳執弟子禮



